




# Peskiza Bem Estar LGBTIQ<sup>+</sup> iha Timor-Leste

2023-2025













## **Prefásiu**

### **Dalan-naruk ba Igualdade Jéneru**

Nudar Provedor de Direitos Humanos e Justiça, ha'u sente haksolok no onradu tebes atu hakerek lian makloke hodi introduz peskiza kona-ba "bem-estar" LGBTIQ iha Timor-Leste. Peskiza ho titulu LGBTIQ Wellness in Timor Leste ne'e rezultadu hosi esforsu ne'ebe organizasaun Arcoiris Timor-Leste halo ho tulun husi ASEAN SOGIESC Caucus & Women Fund Asia.

Ha'u nia apresiasaun kle'an ba Arcoiris Timor-Leste nia 'aten-barani' atu produz obra monumental ida ne'e. Ha'u konsidera peskiza ida ne'e monumental hosi ponto de vista direitos humanos nian no iha kontekstu Timor-Leste nudar "Estado de direito democrático...baseado na vontade popular e no respeito pela dignidade da pessoa humana" hanesan hakerek iha Artigo 1 Konstituisaun Repúblika Demokrátika Timor-Leste.

Iha luta ba igualdade jéneru, termu 'aten-barani' nia definisaun dala-barak la hanesan iha perúdu funu-laran. Iha funu-laran, ita kombate hasoru funu-maluk ida de'it no dalaruma hosi direisaun ne'ebe ita fasil atu identifika.

Iha luta ba igualdade jéneru, liuliu iha ita nia sosiedade timorense. Sosiedade ida ne'ebe produdu hosi relação longa e harmónica entre kultura patriarkal-feudal ho valor konservador relijiaun, hanesan ita dadain ita nia fuan rasik. Relijiaun iha ne'e la'os de'it refere ba katolisismo, maibe mos animismo, fiar tradisional ne'ebe nia prátika sei existe hela iha sosiedade timorense nia leet.

Hosi esperiensa nudar ativista média no direitos humanos ha'u konsidera luta no advokasia ba igualdade jéneru iha Timor-Leste, liuliu rekonhesimentu ba existênci-igual ba comunidade LGBTIQ nudar luta "contra tudo e contra todos (against everything and everyone)." Iha luta ida ne'e, ativista no defensor direitos humanos sira la'os de'it hasoru obstakulu real, promotor hanoin patriarkal no entidade fabrikador hanoin misogínia. Hanoin misogínia, refere ba sentimentu ódiu, desprezu hasoru fetu ka forma diskriminasaun ne'ebe ekspresa liuhosi dalan oin-oin hanesan violênci, eskluzaun sosial no objetifikasaun seksual. Ho lian merkadu (bahasa pasar) karik ita dehan, ita la'os hasoru ema moris de'it maibe hasoru mos mate-klamar sira. La'os de'it kontra diabu ho demóniu, maibe mos kontra 'maromak' ho 'lulik.' Iha luta ida ne'e, ita, ativista direitos humanos sira la iha anjo da guarda (guardian angel), tanba ita nia anjo da guarda, inklui ita nia inan-aman sira mos dala-barak hamriik ho huru-hara iha mota-sorin hotu.

Iha ne'e, ita foin ko'alia kona-ba rekonhesimentu ba comunidade LGBTIQ nia ezistênci. Ita seidauk tama to'o iha igualdade de direitos, ne'ebe implika direito atu harii família hanesan haktuir iha Artigo 39 Konstituisaun.

Provedor la kontesta data sira ne'ebe peskiza ne'e apresenta. Data sira ne'e justu mai reforsa liutan ita (defensor direitos humanos sira) nia fundamentu advokasia katak ezistênci komuidade Lesbian, Gay, Bissexual, Transgender, Intersex, Queer (LGBTIQ) iha Timor-Leste ne'e existe duni, no barreira socio-kultural no relijioza ne'ebe halo sira terus no moris iha diskriminasaun no marjinalizasaun durante periudu naruk ne'e realidade sosial ida.

Repúblika Demokrátika Timor-Leste nudar Estado de Direito Democrático ne'ebe bazeia ba "respeito pela dignidade da pessoa humana" no "universalidade e igualdade" direito, tuir loloos iha ona política pública ida ne'e sériu, klaru no koerente hodi halakon barreira socio-cultural no relijioza oin-oin ne'ebe diskrimina no marginaliza comunidade LGBTIQ. Prinsipiu ne'ebe Artigo 16 KRDTL konsagra mak universalidade no igualdade ka "não discriminação." Artigo ne'e dehan: "(1) Sidadaun hotu-hotu hanesan



iha lei nia oin, no mos iha direitu no obrigasaun hanesan; (2). Labele halo diskriminasaun ba ema ida tanba nia kulit (kor), nia rasa, nia estadu sivil, nia seksu, oríjen étniku, nia lian, pozisaun sosiál eh ekonómiku, hanoin politiku ka ideologia, relijiaun, instrusaun eh nia kondisaun fízika eh mental.”

Infelizmente, ekspetativa ideal tuir Lei-Inan ne'e ita seidak haree. Realidade ne'ebe ita haree no akompanha ho laran-susar mak diskriminasaun kontínua no prekonseitu sosial permanente hasoru comunidade LGBTIQ sira. Izemplu balun ne'ebe ita bele uza nudar referénsia ba situasaun triste ne'e mak kazu Aldo, membru comunidade LGBTIQ ne'ebe deside oho-na tanba la aguenta ho diskriminasaun sosial no desprezu hosi nia família rasik. Izemplu seluk ne'ebe mak sai destaque públiku mak prezensa Prezidente Repúblika nudar testemunha ba kazamentu Bella Galhos, dirigente Arcoiris ho nia parseira Iram Saeed iha Darwin, Australia tinan 2024 liuba.

Tanba ne'e, halo peskiza kona-ba asuntu LGBTIQ hodi fornese data importante hodi sai referensia ba advokasia hanesan mahu-been turuk iha tempu bailoron hodi hamatak no haburas ita nia esperansa. Esperansa atu hakat nafatin iha luta difícil ne'e. Pontu importante ida mak peskiza ne'e anota mak interpretasaun ba Artigu 16, numeru (2). Iha redasaun la temi termu “orientasaun seksual”, maibe temi de'it “seksu”. Redasaun ne'ebe fo marjem ba ema, grupu ka entidade tradisional, konservador no misogíniu sira hodi halo interpretasaun katak la iha rekonhesimentu ba jéneru LGBTIQ sira. Interpretasaun ne'ebe halo ema sira ne'e haluha-na katak maski Konstituisaun la temi liafuan “orientasaun seksual”, la signifika katak Konstituisaun fo dalan ba sira atu halo diskriminasaun ka violência hasoru comunidade LGBTIQ sira.

Maski Konstituisaun la ekspresadamente bandu diskriminasaun hasoru comunidade LGBTIQ sira, maibe preseitu legislador sira dezenvolve ona preseitu konstitusional ida ne'e iha Kódigu Penal (KP) ho intensaun atu halo proteksaun ba sidadaun sira, katak bele konstitui sirkunstánsia agravante jerál, bainhira ema/ajente halo krimi ho motivaun sentimentu diskriminatóriu relasiona ho vítima nia jéneru, ideologia, relijiaun, etnia, nacionalidade, seksu ka “orientasaun seksual”, moras ka diminuisaun fízika (al. e) nú. 2 iha artigu 52 Kódigu Penal (KP), iha Dekretu-Lei nú. 19/2009, 8 de abril.

Bazeia ba preseitu legal no ordenamento jurídiku timor nian ne'e, aktu agresaun fízika, violénsia seksual ka violénsia psicolójika konstitui krimi no iha responsabilidade criminal ba aktu refere hanesan prevê iha Kódigu Penal. Bainhira aktu violénsia ne'e mosu iha uma-laran entre membro família ne'e konsidera nudar krimi públiku tuir Lei nú. 7/2010, 7 de julho kona-ba Violénsia Doméstika.

Iha Timor-Leste, aleinde iha garantia konstitusional, legal iha Kódigu Penal, Estado RDTL mos ratifika ona Paktu Internasional kona-ba Eliminaun Forma Diskriminasaun hotu-hotu hasoru Feto (CEDAW-sigla ingles) liuhosi Rezolusaun Parlamentu Nú. 11/2003, 17 de setembro.

Maski nune'e, ita hotu rekonhese, hanesan peskiza ne'e apresenta katak, garantia no preseitu legal sira ne'e la suficiente atu halakon diskriminasaun no violência hasoru comunidade LGBTIQ sira. Aleinde seriedade hosi Estado atu aplika lejislasaun sira ho konsisténsia ba prinsípiu direitos humanos nian, iha nesiedade imediata atu hasa'e konsiénsia pública, inklui maker-ukun no makaer-fukun sira atu hakruuk ba prinsípiu governasaun-di'ak tuir lei no konstituisaun haruka.

Dalan sei naruk atu luta ba igualdade jéneru, maibe ita tenki hakat bebeik. Iha ita nia hakat ne'e, ita tenki aten-barani atu transforma buat sira ne'ebe “la baibain” sai “baibain” no transforma buat sira ne'ebe “baibain” sai “la baibain.” Katak, ezistensia ema/comunidade LGBTIQ ne'e buat ne'ebe ema barak dehan “la baibain”, ita tenki halo atu ema fiar katak ne'e buat “baibain” ida. Nune'e mos



diskriminasaun no violénsia hasoru fetu no ema LGBTQI ne'ebe ema barak fiar katak buat "baibain", ita tenki hakilar sai katak ne'e krimi no la'os buat "baibain."

Nudar Provedor, no hanesan mos ativista direitos humanos, ha'u komprometidu atu luta hamutuk ho maluk sira seluk hodi garante igualdade ba ema hotu, liliu igualdade ba fetu no comunidade LGBTIQ sira.

Atu to'o iha ne'eba ita tenki fiar ba transformasaun. Transformasaun ema nian. Fiar katak, buat ne'ebe uluk ema bele halo, agora labele ona halo. Uluk, ema bele baku fetu no halo violénsia hasoru nia oan sira, agora labele ona. Fiar mos katak buat ne'ebe uluk ema labele halo, agora ita bele halo. Uluk fetu no ema LGBTIQ la iha direito, agora sira iha direito hanesan ho mane sira.

Ita mos tenki barani atu dadain-fuan, haklarik-aten. A Luta Continua!

Gutta cavat lapidem!

Virgilio da Silva Guterres

Provedor ba Direitus Humanus no Justisa (PDHJ)



## Rekonhesemento

Hau hakarak hato'o hau nia apresiazaun profundo ba Komunidade e familia tomak nebe halo parte iha prosesu pesquisa ida nee, fo imi nia tempu, energia, inklui imi nia hanoin positivo sira nudar pasu diak oinsa hamutuk, ita kria sociadade ida inkluisivo, sura ema hotu, e lahusik ema ida iha kotuk. Pesquisa ida nee dedika ba Ami nia membro Aldo nebe husik hela Mundo ho mensagem forti “ Luta LGBTIQ Luta ba Direitus Humanus”, Aldo nia Mehi sei tane as, liu hosi ita tomak nia esforsu atu garantia ema hotu hetan tratamento hanesan, hanesan Ema e ho digno.

Hau nia agradecemento klean ba collages no Maluk sira , Provedor Diretus Humanus, Gill Guterres, Dr. Lili chen, Ambrocio Colo, equipa investigador Foinsae LGBTIQ ba sira nia servisu tomak, durante halao prosesu pesquisa ida nee too ninia rohan.

Ha'u mos hato'o agradeseamento espesial ba Iram Saeed ba dezeñu peskiza, instrumentu peskiza no lidera investigadór LGBTIQ sira iha prosesu koleasaun dadus iha munisípiu tarjeito. Dokumentu ida-ne'e sei la posivel se la iha nia tempu no enerjia.

Ikus, lahaluha agradece mos ba asistencia, fasilidades rekursu, esforsu hirak nebe hatur iha asaun tomak hodi kompleta pesquisa hosi Parseria tomak, liu-liu Women Fund Asia, ASEAN SOGIESC Caucus, no Equipa Arcoiris Timor Leste.

Ho esperansa bot katak Pesquisa ida nee sai lalenok, haklean prespectiva diak no dalan lori mudansa iha presenza no futuru Timor ida ba Timor oan hotu, Timor Oan hotu ba Timor ida deit.

Ha'u dedika peskiza ida-ne'e ba Aldo, membru LGBTIQ joven Arcoiris ne'ebé luta ho aten-barani durante nia moris, to'o tempu ikus nia hakotu nia vida iha Mundo, maibe husik hela mai ita Kbit atu kontinua hamrik, lao hodi halo mudansa.

Bella Galhos  
Co-Founder ho Diretóra  
Arcoiris Timor Leste  
Marco, 2025



RELATÓRIU PESKIZA BEM ESTAR LGBTIQ TIMOR-LESTE 2023 NO 2024

A.	SUMARIU EZEKUTIVU	3
B.	ANTESEDENTE	4
1.	Kontestu histórikal	4
2.	Formulasaun problema	6
3.	Objetivu peskiza	6
C.	METODU PESKIZA	6
1.	Aproximasaun Feminist Participatory Action Research	6
2.	Prinsipiu Etika Peskiza	8
3.	Atividade sira iha prosesu peskiza nian	9
4.	Limitasaun sira	9
5.	Kalendariu no planu servisu	9
6.	Partisipante Peskiza	9
1.1.	Membru comunidade LGBTIQ	9
1.2.	Familia hosi membru comunidade LGBTIQ	10
1.3.	Fornesedor servisu ba comunidade LGBTIQ	10
D.	REZULTADU NO DISKUSAUN	11
1.	Konesimentu no Programa sira bá comunidade LGBTIQ	11
1.1.	Númeru kompriensaun hosi família no fornecedor servisu	11
1.2.	Familia nia tratamentu ba membru LGBTIQ	11
1.3.	Programa inkluzivu husi fornecedor servisu sira	12
2.	ANALIZE BEM ESTAR MEMBRU LGBTIQ	13
2.1.	Traballu	13
2.2.	Rendimentu	15
2.3.	Familia, Hela fatin no Edukasaun	16
3.	IDENTIDADE JENERU, ORIENTASAUN SEKSUAL NO DISKRIMINASAUN SOSIAL	17
3.1.	Jeneru no Seksualidade	17
3.2.	Diskriminasaun sosial ba comunidade LGBTIQ	18
3.3.	Diskriminasaun sira hosi pontu vista Familia no Fornesedor servisu	19
4.	KRIME SIRA HASORU KOMUNIDADE LGBTIQ	20
4.1.	Ameasa, intimidasaun fíziku no Violensia fíziku hasoru comunidade LGBTIQ	20
4.2.	Proporsaun violensia tuir identidade jeneru no autor sira	21
4.3.	Perspetiva krime no protesau lei hosi familia no fornecedor servisu	21
5.	KONDISAUN & LALA'OK SAUDE	22
5.1.	Moras venerea sira	22
5.2.	Assistensia medika ba comunidade LGBTIQ sira	23
5.3.	Stigma no diskriminasaun asesu servisu saude	23
6.	RELACIONAMENTU, SENTIMENTU, NO SAUDE MENTAL	24
6.1.	Relasaun ho parseiru/a	24
6.2.	Sentimentu negativu sira	26
6.3.	Depresaun, Izola-an & Suisidu	27
6.4.	Situasaun passadu, atual no esperansa futuru nian	30
E.	KONKLUZAUN	31
F.	INTERVENSAUN ESTRATEJKA & REKOMENDASAUN	33
	Referensia sira	36



## A. SUMARIU EZEKUTIVU

Peskiza ida-ne'e ho objetivu atu analiza bem-estar comunidade LGBTIQ iha Timor-Leste iha tinan 2023 no 2024, ho foku ba kondisaun sosiál, ekonómika, saúde no diskriminasaun ne'ebé comunidade ida-ne'e esperiénsia. Uza aprosimasaun Peskiza Asaun Partisipativu Feminista (FPAR), peskiza ida-ne'e envolve partisipasaun ativu hosi comunidade LGBTIQ hodi komprende dezafiu sira ne'ebé sira hasoru no propoin pasu estratéjiku sira hodi hadi'a bem-estar no protesau ba grupu ida-ne'e.

Peskiza ida-ne'e uza métodu mixu (kualitativu no kuantitativu) ne'ebé inklui estudu literatura, entrevista kle'an, diskusaun grupu foku (FGD), no levantamentu kuantitativu ba membru 163 hosi comunidade LGBTIQ, membru família 79, no fornecedor servisu 81 iha setór oioin. Estudu ida-ne'e mós konsidera prinsípiu étika peskiza nian, hanesan konsentimentu informadu, konfidensialidade dadus nian, no aprosimasaun ida ne'ebé sensível ba impaktu psikososial sira.

Deskobrimentu Xave sira:

1. Konxiénsia Sosiál no Aseitasaun
  - Nivel komprensaun hosi família sira no fornecedor servisu sira hasoru comunidade LGBTIQ sei limitadu. Besik 60.8% hosi família sira komprende dezafiu sira ne'ebé maka comunidade LGBTIQ hasoru, maibé fornecedor servisu 51.3% de'it maka iha konxiénsia hanesan.
  - 67.1% hosi família sira simu sira-nia membru família LGBTIQ, maibé iha nafatin 7.6% ne'ebé rejeita kompletamente sira no 6.3% ne'ebé esplísitu la rekoñese sira-nia membru família sira-nia identidade jéneru.
2. Saúde no Asesu ba Servisu sira
  - Diskriminasaun iha servisu saúde akontese nafatin, difikulta comunidade LGBTIQ nia asesu ba servisu médiku ne'ebé apropiadu.
  - stigma iha servisu saúde nian lori ba nivel konsulta médiku sira ne'ebé ki'ik, liuliu kona-ba saúde mental no moras sira ne'ebé hada'et liuhosi relasaun seksuál. Taxa depresaun, izolamentu sosiál, no risku ba suisídiu aas iha comunidade ida-ne'e, liuliu

tanba presau familia no sosiál.

3. Ekonomia no Empregu
  - Komunitade LGBTIQ hasoru difikuldade atu hetan serbisu ne'ebé di'ak. 7.1% de'it mak servisu iha setór públiku, enkuantu 20% servisu tempu tomak iha setór privadu no 16.8% servisu tempu balun.
  - Maioria hosi comunidade ida-ne'e iha rendimentu ki'ik liu USD 100 kada fulan, ki'ik liu saláriu mínimu nasional USD 115
  - 42.9% hosi respondente sira husik eskola tanba limitasaun ekonómiku no diskriminasaun, ne'ebé limita liután sira-nia oportunidade empregu.
4. Violénsia no Kriminalizasaun
  - 61.9% hosi comunidade LGBTIQ esperiénsia diskriminasaun iha forma oioin, inklui asédu verbál no fíziku no eskluzaun sosiál.
  - 31% esperiénsia ameasa ka intimidasaun fíziku iha sira-nia família rasik.
  - 16.1% hetan ameasa violénsia fíziku, inklui iha 10.3% mak hetan violénsia fíziku maka'as liu.
  - Fornecedor servisu sira no família sira deklara katak comunidade LGBTIQ nafatin vulneravel ba forma oioin violénsia nian tanba laiha protesau legal ne'ebé forte.

Rezultadu husi peskiza ne'e hatudu katak comunidade LGBTIQ iha Timor-Leste hasoru nafatindezafiu signifikante iha aspetu sosiál, ekonómiku, saúde no protesau legal. Maski iha progresu iha aseitasaun sosiál, estigma no diskriminasaun sai nafatin obstákulu boot sira. Presiza polítika inkluzivu liu no apoiu entre setór sira atu kria ambiente ida justu no igual liu ba comunidade LGBTIQ iha Timor-Leste. Implementasaunintervensaun estratéjiku sira hein atu hadi'ak bem-estar no garante protesau di'ak liu ba comunidade sira-ne'e. Hasa'e koñesimentu públiku importante tebes hodi halakon estigma no diskriminasaun hasoru comunidade LGBTIQ. Edukasaun iha eskola no formaun ba fornecedor servisu sira presiza hametin atu nune'e sociedade komprende



di'ak liután no respeita diversidade. Aleinde ida-ne'e, asesu ba servisu saúde fíziku no mentál ne'ebé inkluzivu tenke hadi'a liuhosi estabese sentru saúde sira ne'ebé amigavel ba comunidade LGBTIQ no fornese programa akonsellamentu hodi prevene depresaun, izolamentu sosiál no risku suisídiu.

ha parte seluk, presiza hametin protesau legal liuhosi haforsa lei anti-diskriminasaun, no mós fó assisténsia legal ba vítima violasaun direitu sira. Apoiu ekonómiku mós krusiál, liuhosi habelar programa formasaun abilidade sira, asesu ba kapitál negósiu no oportunidade empregu inkluzivu. Kombinasau husi medida sira ne'e sei kria ambiente ida ne'ebé ekuitativu liu no fó apoiu ba comunidade LGBTIQ iha Timor-Leste.

## B. ANTESEDENTE

### 1. Kontestu histórikal

Iha rejiaun ASEAN, comunidade LGBTIQ (Lesbian, Gay, Bisexual, Transgender, Intersex & Queer) hasoru nafatin obstákulu oi-oín hodi luta ba sira nia direitu.

Fatór sira hanesan lejislasau rai-laran ne'ebé fraku, resposta mínimu hosi mekanizmu direitus umanus, no influénsia hasoru comunidade ida-ne'e. Obstákulu sira-ne'e nia abut iha valór patriarkál sira ne'ebé domina estrutura sosiál no polítika sira iha rejiaun.

Timor-Leste, maski Konstituisau RDTL garante direitus umanus ba ema hotu-hotu, maibé seidauk inklui ho esplísitu orientasaun seksuál no identidade jéneru (SOGIE). Iha tinan 2001, durante deliberasaun Assembleia Konstituante Timor-Leste nian, foti desizaun signifikativu ida kona-ba enkuadramentu konstitusionál nasaun nian iha parte anti-diskriminasaun.

Iha membru Assembleia Konstituante nain-52 hosi nain-88, vota a favor hodi hasai termu "orientasaun seksuál" husi Artigu 16 esbosu finál konstituisau nian. Artigu ida-ne'e nia intensaun atu trasa protesau sira hasoru diskriminasaun bazeia ba fatór oi-oín hanesan rasa, jéneru, etnia, estatutu sosiál no ekonómiku, fiar polítiku, relijiaun, edukasaun, no kondisaun fíziku ka mentál. Hasai "orientasaun seksuál" hosi provizaun ida-ne'e fó momentu pivotal ida iha formasaun nasaun foun



Timor-Leste nia postura legál kona-ba direitu LGBTIQ, esklui ho efetivu protesau konstitusionál esplísita sira ba indivídu sira bazeia ba sira nia identidade seksuál.

Desizaun ne'e hamosu diskusaun sira kona-ba inkluzividade, igualdade, no direitus umanus iha nasaun ne'ebé foin independente. Enkuantu razaun iha votu maioria varia entre membru assembleia sira, balun espresa preokupasaun kona-ba norma kulturál no sosiál sira, enkuantu sira seluk subliña nesesidade atu foka ba medida anti-diskriminasaun ne'ebé luan liu. Eskluzau "orientasaun seksuál" hosi testu konstitusionál iha implikasaun ba tempu naruk ba indivídu LGBTIQ sira iha Timor-Leste, hodi influensia interpretasaun legál no dezvoltamentu polítika iha tinan sira tuir mai. Momentu ida-ne'e iha istória konstitusionál nasaun nian reflète kompleksidade sira hosi balansu valór tradisionál sira ho diskursu direitus umanus sira ne'ebé mosu iha nasaun demokrasia joven ida ne'e.

Maski hasai tiha termu "orientasaun seksuál" hosi kláuzula anti-diskriminasaun, Timor-Leste hatudu ona ninia kompromisu ba direitus umanus no igualdade, liu hosi ratifika Konvensaun kona-ba Eliminaun Forma Hotu-hotu Diskriminasaun Hasoru Feto (CEDAW) no Paktu Internasionál kona-ba Direitu Sivil no Polítiku (ICCPR), ne'ebé promove direitu no protesau fundamentál sira ba indivídu hotu-hotu, la haree ba jéneru, estatutu, ka background. Akordu sira-ne'e reforsa enkuadramentu legál nasaun nian iha salvaguarda direitus umanus no garante katak prinsipiu sira igualdade nian hetan kaer metin.

Nasaun foti ona pasu sira hodi promove igualdade, inklui iha tinan 2011, ONU publika nia relatóriu dahuluk kona-ba direitu LGBTIQ (UN High Commissioner for Human Rights, 2011), no nasaun liu 80 asina deklarasaun konjunta kona-ba hapara aktu violénsia no violasaun direitus umanus relasionadu bazeia ba orientasaun seksuál no identidade jéneru, inklui Timor-Leste (UN Human Rights Council, 2011).

Ho fundamentu suporta inkluzivu ida ne'ebé grupu marjinalizadu hanesan LGBTIQ mós presija hetan atensaun maka'as, iha 2017 Primeiru Ministru Rui Maria de Araújo hato'o mensajen forte kona-bá lale halo diskriminasaun ba joven ho orientasaun seksual la bináriu. Ambitu selebrasaun Loron 28 fulan Juñu hanesan Loron Internasionál ba Pride LGBT, iha tinan hanesan comunidade LGBTIQ iha Timor-Leste hala'o parade Pride iha Dili, hodi assiste momentu istóriu ida ho Marsa Pride LGBTIQ dahuluk, ne'ebé marka pasu signifikativu ida iha luta ba igualdade no rekoñesimentu ba identidade oioin. Ema atus ba atus, inklui ativista, aliadu, no membru comunidade LGBTIQ, halibur hamutuk iha Dili hodi selebra sira nia ezistensia no ezije direitu hanesan. Eventu ne'ebé hetan apoiu hosi organizasaun sosiedade sivil oioin no parseiru internasionál sira, haruka mensajen forte ida kona-ba inkluzividade no respeito ba direitus umanus.

Dezafiu sira sei iha nafatin ba comunidade LGBTIQ, tanba protesau legál sira sei limitadu nafatin, no estigma sosiál sei persiste. Direitu fundamentál barak hosi comunidade LGBTIQ seidauk hetan protesau tomak iha Timor-Leste (Reuters, 2017).

Sira nia asesu ba setór oioin, hanesan edukasaun, empregu, no saúde, relativamente limitadu, aumenta tan ho COVID-19 no regulamentu relevante sira (Chen & Martins, 2022). Iha 2017, peskiza dahuluk kona-ba comunidade lésbika, biseksuál, no transjéneru (LBT) iha Timor-Leste destaka lakuna sira-ne'e, hodi revela dezafiu signifikativu sira hanesan diskriminasaun bazeia ba jéneru, violénsia iha família, no asesu limitadu ba kuidadu saúde no edukasaun. Intimidasaun, diskriminasaun no violénsia seksuál ka bazeia ba jéneru hasoru comunidade LGBTIQ a'as. Estudu ida (Saeed & Galhos, 2017) hatudu katak porsentu 86 hosi ema LBT sira esperiénsia forma violénsia oioin, barak hosi família no comunidade sira. Barreira sira-ne'e la'ós de'it sobu direitu fundamentál sira maibé mós fó impaktu negativu ba moris-di'ak fíziku, emocionál no sosiál hosi indivíduu LBT sira, hodi hamenus sira-nia kualidade moris en jerál.



Ida-ne'e urjente atu iha informasaun no dadus atualizadu sira hodi informa polítika no instrumentu legál sira iha protesasaun no promosaun ba direitu LGBTIQ sira. Iha peskiza kona-bá Bem estar LGBTIQ iha tinan 2023 no 2024, hanesan estudu ida ne'ebé buka atu hatene situasaun lolós ne'ebé comunidade LGBTIQ sira hasoru iha sira-nia moris lor-loron. Alem ida ne'e, bele halo komparaun ho peskiza iha tinan uluk nian, hodi bele fó imajen olístiku ida ne'ebé bele hateke hetan nia mudansa sira. Tanba ne'e, presiza halo estudu nasionál mapeamentu no avalia kondisaun moris no estatutu comunidade LGBTIQ iha Timor-Leste.

## 2. Formulasau problema

Formulasau problema ida-ne'e ho objetivu atu komprende kondisaun lolós hosi comunidade LGBTIQ, no identifika dezafiu sira iha esforsu ida atu kria ambiente ida ne'ebé inkluzivu liu.

- Oinsá kondisaun bem-estar fíziku, sosiál no emosionál comunidade LGBTIQ nian iha Timor-Leste?
- Forma diskriminasaun saida mak comunidade sira ne'e hasoru hodi asesu ba servisu báziku sira hanesan saúde, edukasaun no empregu?
- Oinsa maka relasaun entre comunidade LGBTIQ no sira nia família no fornecedor servisu sira?
- Etapa estratéjiku saida maka bele foti atu hamenus diskriminasaun no hasa'e aseitasaun sosiál ba comunidade LGBTIQ?

## 3. Objetivu peskiza

Peskiza ne'e ho objetivu atu dokumenta no kompriende dezafiu sira ne'ebé comunidade LGBTIQ hasoru iha Timor-Leste. Uza aprosimasaun advokasia bazeia ba evidénsia feminista, peskiza ida-ne'e buka atu prodús dadus relevante hodi apoia esforsu advokasia iha nivel nasionál no rejionál. Aprosimasaun ida-ne'e la'ós de'it ajuda atu komprende kondisaun sira hosi comunidade LGBTIQ, maibé mós fornese baze ida atu kria polítika sira ne'ebé maka inkluzivu liu no responde ba sira nia neseseidade sira.

Atu atinji objetivu hirak ne'e maka, define mos objetivu espesifiku sira hodi bele kontribui kompriensaun sira ne'ebé klaru liu tán;

1. Identifika Bem-Estar Komunitade nian: Halo levantamento ida kona-ba bem-estar comunidade LGBTIQ nian, inklui aspetu sosiál, ekonómiku no emosionál.
2. Komprende Relasaun Família nian: Ezamina relasaun sira entre membru sira hosi comunidade LGBTIQ no sira nia família, no impaktu ne'ebé ida-ne'e iha ba sira nia moris.
3. Identifika Diskriminasaun: Revela forma diskriminasaun ne'ebé hasoru bainhira asesu ba servisu báziku sira hanesan edukasaun, saúde no empregu.
4. Fó Rekomendasaun sira: Dezenvolve rekomendasaun estratéjiku sira hodi hamenus diskriminasaun no hasa'e aseitasaun sosiál.

## C. METODU PESKIZA

### 1. Aprosimasaun Feminist Participatory Action Research

Peskiza ida-ne'e uza aprosimasaun "Feminist Participatory Action Research" (FPAR) ne'ebé ho objetivu atu envolve ativamente comunidade LGBTIQ iha prosesu peskiza. Nia tarjetu atu empodera comunidade vulneravel sira seluk, hanesan LGBTIQ, para sira bele sai sujeitu ka atór/kriadór sira hosi realidade sosiál (Lykes et al., 2021; Wendy et al., 2009). Aprosimasaun ida-ne'e la'ós de'it foka ba rekolla dadus, maibé mós garante katak prosesu peskiza tomak no depois fó kbiit ba comunidade sira ne'ebé envolve, liuhosi fó ba sira lian no oportunidade atu fahe esperiénsia sira ho vontade rasik.

Matenek-na'in barak maka simu ideia sira hosi Peskiza Asaun Partisipativu (PE), ne'ebé nia orijen hosi Paulo Freire (1970) ne'ebé defende katak ema kiak no eskuidu sira bele no tenke analiza sira nia realidade rasik, no tuirmai dezenvolve ba Avaliasaun Rurál Lalais (RRA) no Avaliasaun Rurál Partisipatóriu (APR), ne'ebé fiar katak bele aumenta validade peskiza nian no fó kbiit ba comunidade lokál liuhosi integra sira nia koñesimentu no esperiénsia sira (Chambers, 1981, 1996).

Vantajen ida hosi fó prioridade ba comunidade lokál iha peskiza maka atu hasa'e validade no konfiabilidade. Konseitu no sasukat sira ne'ebé simplifikadu bele troka kompleksidade no diversidade hosi rezultadu sira, maibé koñesimentu lokál bele hadi'a relevánsia no konfiansa (Chambers, 1996). Hodi lori peskiza besik ba comunidade lokál, sira bele hahú halo sentidu ka reflète kona-ba realidade sosiál kompleksu iha ne'ebé sira hela ba. Maske PAR kontribui ba fahe podér liuhosi inklui no serbisu ho comunidade lokál sira, peskiza ne'ebé orienta ba PAR hetan krítika hanesan neutru ba jéneru (Reinharz, 1992), sentradu iha mane (Maguire, 1987), no mós konduzivu atu reproduz ierarkia podér nian, dezigualdade, no injustisa iha sosiedade nia laran (Cahill, 2007). Esklui ka la representa esperiénsia sira hosi fetu no labarik-fetu sira bele halo realidade sosiál la muda. Tanba ne'e, objetivu sira jéneru no emancipasaun nian iha tendénsia atu destaka iha Peskiza Asaun Partisipativu Feminista (FPAR), ne'ebé haree comunidade sira ne'ebé ladún iha kbiit ka laiha kbiit, fetu no labarik-fetu sira, ka comunidade vulneravel sira seluk, hanesan LGBTIQ, hanesan sujeitu ka atór/kriadór sira hosi realidade sosiál (Lykes et al., 2021; Wendy et al., 2009). Goessling (2024) hatudu oinsá FPAR ida ne'ebé sentradu iha foin-sa'e sira hala'o iha ne'ebé foin-sa'e sira maka foin-sa'e

sira maka kokriadór sira koñesimentu nian no atór sira hodi muda sira nia realidade sira.

FPAR nia objetivu bo'ot maka inkluziun comunidade lokál sira-nian. Ida-ne'e apela atu transforma estrutura no ideia opresivu sira ne'ebé manifesta ho ierarkia podér no dezigualdade.

Iha hakarak atu transforma fiar no prátika dominante sira ne'ebé maka la hakerek hosi podér liuhosi fó kbiit ba comunidade lokál sira atu hamosu koñesimentu no foti asaun kolektivamente (Maguire, 1987). "Mudansa akontese tantu liuhosi fó kbiit ba fetu sira iha peskiza no liuhosi fahe informasaun ne'ebé muda ema seluk nia asaun sira" (Gatenby & Humphries, 2000, p. 90).

Iha peskiza FPAR ida hosi Gatenby no Humphries (2000), peskizadór sira hakarak atu buka hatene partisipante sira-nia komprensaun kona-ba kareira sira no dezenvolve konxiénsia feminista hasoru estrutura opresivu sira iha partisipante sira-nia sorin enkuantu defende prinsípiu feminista sira ba peskiza iha adosaun ferramenta no métodu peskiza nian. Sira uza definisaun luan ida kona-ba kareira maibé "mantein vizaun krítiku ida kona-ba asumsaun sira ne'ebé subjasente ba ida-ne'e" (Gatenby & Humphries, 2000, p. 91).





Entretantu, hodi fó atensaun ba dalan no opsaun sira kareira nian, peskizadór sira nota estrutura oportunidade ne'ebé la hanesan no limitasaun sira ne'ebé partisipante ida-idak hasoru. Iha termu sira hili no dezeńu métođu peskiza nian, peskizadór sira uza entrevista semi-estruturadu no kestionáriu sira. Hodi haree partisipante sira hanesan ko-peskizadór sira, iha espasu sira ba sira atu hamutuk ho dezeńu no implementasaun kestionáriu nian. Partisipante sira iha oportunidade atu halo revizaun ka hasai pergunta sira ne'ebé dezeńu hosi peskizadór sira. Nune'e mós, kestionáriu ne'ebé uza iha peskiza ida-ne'e "husu pergunta oioin ne'ebé nakloke, ho espasu barak ne'ebé permite ba partisipante sira atu espresa sira nia ideia no sentimentu sira (Gatenby & Humphries, 2000, p.92)." Aleinde kestionáriu sira, peskiza mós konsidera ferramenta oioin, hanesan "e-mail, karta, xamada telefónika no vizita sira," bele mós ajuda elabora informasaun relaciona ho sira-nia moris pesoál (Gatenby & Humphries, 2000, p.94).

Maski iha tipu FPAR barak, sira uza métođu oioin, hanesan entrevista, konta istória, diskusaun grupu fokus, observasaun, hakerek, arte, nst, maibé prinsípiu balu fundamentál. Iha relatóriu mapeamentu LGBTIQ ka SOGIE foin lalais ne'e iha Sudeste Aziátiku ne'ebé utiliza FPAR, ida-ne'e halo rezumu ba matadalan oioin kona-ba FPAR (Pratama & Afriani, 2024, pp. 20–21):

- (1) Husu pergunta foun sira;
- (2) Hili métođu sira;
- (3) Peskiza ba ema marjinalizadu sira;
- (4) Tau matan ba kestaun sira kona-ba diferença;
- (5) Foka ba esperiénsia moris nian;
- (6) Konxiénsia kona-ba dinámika poder nian no prátika reflexividade maka'as iha prosesu peskiza nian;
- (7) Transformasaun sosiál.

FPAR la'ós la iha dezafiu sira. Asuntu dezafiante balu ne'ebé levanta inklui uza número sira ka kestionáriu sira, ne'ebé inklui pergunta abstratu no jerál sira, bele provoca trauma sira, memória triste sira, ka emosaun aas sira hosi pasadu ba

partisipante sira. Aleinde ne'e, silénsiu ka resposta sira ne'ebé la fahe ka ko'alia entre partisipante sira bele sai hanesan buat baibain, tanba risku ka perigu balu maka implika ba partisipante sira. Dalaruma, partisipante sira bele internaliza normalidade estruturál maski sira hetan oportunidade atu identifika ka muda sira. Konsidera impaktu emosional no impaktu sira seluk hosi peskiza ne'ebé bele iha ba partisipante sira, prátika étika sira, hanesan konsentimentu informadu, konfidensialidade, kuidadu, no flexibilidade, tenke disponivel. Prosesu peskiza tomak tenke hetan mós orientasaun hosi prinsípiu étiku sira ne'ebé foka ba partisipante sira ne'ebé asegura partisipante sira-nia partisipasaun iha dezeńu peskiza nian, hetan sira-nia konsentimentu hodi dokumenta no uza informasaun, konfidensialidade, no mós informa sira-nia direitu atu fahe sira-nia istória no ideia sira ka direitu sira atu hapara ka husik peskiza ho livre. Iha peskiza ne'e rasik utiliza metodolojia peskiza ida-ne'e kompostu hosi metodo mixu, ne'ebé dezeńu atu produz dadus kompreensivu liu, iha ne'ebé bazeia ba evidénsia sira:

1. Revizaun Literatura Sekundariu: Ezamina dokumentu sira no peskiza anteriór relaciona ho bem-estar comunidade LGBTIQ iha Timor-Leste no ASEAN.
2. Kolesaun Dadus Kualitativu: Liuhusi entrevista klean, estudu kazu individuál, no kriasaun ensaiu ho foto hodi dokumenta esperiénsia comunidade nian.
3. Kolesaun Dadus Kuantitativu: Dezenvolve no administra kestionáriu ida kona-ba esperiénsia mosris no bem-estar comunidade LGBTIQ nian iha Timor-Leste.

## 2. Prinsípiu Etika Peskiza

Peskiza ida-ne'e adota enkuadramentu étika ida ne'ebé rigorozu atu asegura seguransa, dignidade, no direitu sira hosi partisipante hotu-hotu. Ida-ne'e tuir aprosimasaun ida ne'ebé livre hosi prejúzu, la-diskriminatóriu, no inkluzivu, enkuantu respeita mós sensibilidade sira no esperiénsia moris hosi comunidade LGBTIQ lokál no mos respondente sira seluk;

1. Aproximasaun ida ne'ebé sensível ho seguransa Psikososial;

2. Konsentimentu Informadu no Voluntáriu;
3. Konfidensialidade no Protesaun Dadus;
4. ZEvita danu ba vitima passadu no eskluzaun sosiál;
5. Envolvimentu ativu husi respondente sira;
6. Reflesaun Étika no Transparénsia;

### 3. Atividade sira iha prosesu peskiza nian

1. Konsulta comunidade: Halo diskusaun ho comunidade LGBTIQ, familia no organiza-saun sosiedade sivil iha distritu oi-oin.
2. Entrevista ho parte interesada sira: Envolve ho governu, xefe aldeia sira no fornecedor servisu sira atu komprende sira nia nivel inkluzividade hasoru comunidade LGBTIQ.
3. evizaun polítika nasional: Revee lejislasaun no polítika relevante sira hodi apoia peskiza.
4. Workshop validasaun: Workshop valida-saun ida sei hala'o atu haree filafali desko-brimentu sira, asegura ezatidaun, no halibur feedback hosi comunidade LGBTIQ no parte interesada sira molok publika-saun.
5. Workshop nasional: Hala'o workshop sira hodi fahe rezultadu peskiza nian no envolve parte interesada sira iha diskusaun sira.

### 4. Limitasaun sira

Estudu nia limitasaun sira inklui prejuizu kulturál no barreira linguística sira. Tanba peskiza ne'e hala'o iha kontestu kulturál espe-sífiku, iha possibilidade katak norma no tabu kulturál sira bele influensia oinsá partisipante sira hatán ba pergunta balu, liuliu kona-ba tópiku sensível sira hanesan orientasaun seksuál no identidade jéneru. Adisionalmente, barreira linguística sira bele difikulta abilidade atu kaptura ho loloos esperiénsia sira hosi indivíduu sira ne'ebé ko'alia dialetu ka lian oioin, hodi limita profundidade komprensaun nian iha rejaun balu. Limitasaun seluk mak asesibilidade no partisipasaun husi grupu marjinalizadu sira.

Enkuantu estudu ne'e hakarak halibur dadus hosi indivíduu LGBTIQ oioin, grupu marjinaliza-du balu bele nafatin ladún hetan representa-saun tanba fatór oioin hanesan tauk ba

diskriminasaun, falta asesu ba kanál komunika-saun sira, ka fatin jeográfiku sira ne'ebé dook. Ida-ne'e bele rezulta iha representasaun ida ne'ebé la loos hosi comunidade LGBTIQ, ne'ebé la konsege kaptura kompletamente luta sira hosi indivíduu sira ne'ebé vulneravel liu. Aleinde ne'e, dezeñu transversál hosi estudu limita abilidade atu ezamina mudansa ka tendénsia sira iha tempu naruk iha moris-di'ak hosi comunidade LGBTIQ iha tempu. Dezeñu ida-ne'e fornese de'it imajen ida kona-ba situasaun iha momentu parti-kulár ida, lahó abilidade atu akompaña progresu ka mudansa sira iha kondisaun sira.


### 5. Kalendariu no planu servisu

Activities	3 <sup>rd</sup> Qtr 2023	1 <sup>st</sup> Qtr 2024	2 <sup>nd</sup> Qtr 2024	3 <sup>rd</sup> Qtr 2024	4 <sup>th</sup> Qtr 2024	1 <sup>st</sup> Qtr 2024
Finaliza ba dezeñu peskiza, metodolojia no ferramenta sira						
Atividade peskiza iha distritu selesionadu sira						
Esbosu relatóriu						
Workshop nivel nasional nian						
Submisaun final						

### 6. Partisipante Peskiza

#### 6.1. Membru comunidade LGBTIQ

Peskiza kona- bá bem estar eh moris diak hosi membru comunidade LGBTIQ iha tinan 2023 no 2024, ne'ebé envolve respondente sira hamutuk 163 hosi munisipiu sira hotu, ho distribuisaun hanesan iha grafiku tuir mai;







Predominante hosi Dili nian, tan membru comunidade LGBTIQ sira hosi munisipiu sira seluk maioria konsentrada iha kapitál Dili, ho razaun empregabilidade eh buka rendimentu no asaun koletiva sira seluk. Respondente hirak ne'e maioria domisilia iha area urbana 89.7%, no restante hosi area rural 10.3%. Iha distribuisaun grupu etáriu nian domina hosi idade 20 to'o 29 ho proporsaun 64.5%, sira ho idade 30 to'o 39 hamutuk 23.9%, no restante maka mai hosi idade 19 ba kraik ho idade 40 ba leten.

Iha aspetu sexu no identidade jeneru nian, participante sira kompostu hosi mane 56.1% no feto 45.2%. Maibé, sira nia identidade jéneru nian oioin liu. Totál 16.8% identifika hanesan feto, 7.7% hanesan mane, no 7.7% hanesan non-binary or queer. Adisionalmente, 33.5% maka transjéneru feto sira no 31.0% maka transjéneru mane sira. Dadus ida-ne'e hatudu katak identidade jéneru la sempre aliña ho seksu biolójiku, tanba ne'e importante atu komprende diversidade jéneru iha peskiza ida-ne'e.


### 1.2. Familia hosi membru comunidade

LGBTIQ Respondente familia sira hamutuk nain 79, ida ne'e diminuidu kompara ho respondente membru LGBTIQ, tanba iha familia balun maka labele halo entrevista. Distribuisaun hela fatin familia hosi membru LGBTIQ maka iha area

urbana 77.2% no area rural 22.8%.

Razaun sira hanesan tempu la permite tan okupadu ho servisu sira nian, familia sira rasik ladun iha konesimentu kona-bá sira nia membru familia ne'ebé sai membru LGBTIQ, no mos existe familia balun maka lakohi halo entrevista tanba la simu sira nia membru familia nia identidade jeneru eh orientasaun seksual.

**Respondente familia membru LGBTIQ hosi kada Munisipiu**




### 1.3 Fornesedor servisu ba comunidade LGBTIQ

Iha peskiza ida ne'e halo entrevista ho funsionariu publiku sira hosi instituisaun Estadu, hanesan Servisu Saúde, Edukasaun, Seguransa, Rejistu Notariadu, Servisu Komunitáriu no sira seluk tan, inklui Ajensia Nasional no mos Internasional sira ne'ebé fornese servisu ba bem estar ba publiku, inklui espesifikamente mos ba

komunidade LGBTQI+. Respondente hosi kategoria ida hamutuk nain 81, mai hosi munisipiu 10 hanesan Aileu, Ainaro, Baucau, Bobonaro, Dili, Ermera, Liquica, Manatuto RAEOA no Viqueque.

Respondente fornecedor servisu hosi kada Munisipiu



## D. REZULTADU NO DISKUSAUN

### 1. Konesimentu no Programa sira bá komunidade LGBTQI+

Família no fornecedor servisu sira-nia koñesimentu kona-ba komunidade LGBTQI+ sei limitadu, ne'e dala barak lori ba falta komprensuaun no apoiu. Família barak iha difikuldade atu simu ka komprende sira-nia membru família sira-nia identidade, ne'ebé bele fó impaktu ba relasaun emocionál. Iha parte seluk, fornecedor servisu sira hanesan klínika ka instituisaun edukasionál sira dala barak laiha hanoin adekuaudu kona-ba asuntu LGBTQI+, ne'ebé difikulta sira nia asesu ba servisu sira no bele reforsa sentimentu diskriminasaun nian.

#### 1.1. Númeru komprensuaun hosi família no fornecedor servisu

Nivel komprensuaun fornecedor servisu sira kona-ba komunidade LGBTQI+ hatudu katak 51.3% hatene saida maka LGBTQI+, enkuantu 21.3% lahatene, no 27.5% la fó resposta. Iha parte seluk, nivel komprensuaun hosi família LGBTQI+ aas liu, ho 60.8% hatene, 36.7% la hatene, no 2.5% la fó resposta. Dadus ida-ne'e refleta katak família sira iha komprensuaun di'ak liu kona-ba LGBTQI+ duké fornecedor servisu sira, maibé nafatin presija atu hasa'e konxiénsia iha grupu rua ne'e.

#### 1.2. Família nia tratamentu ba membru LGBTQI+

Maioria família sira ho distribuisaun 67.1% sira aseita no fo tratamentu hanesan ba sira nia membru família LGBTQI+. Maibé, iha nafatin 7.6% hosi família sira ne'ebé maka labele simu sira tomak, enkuantu 6.3% esplísitu la simu identidade hosi membru família sira-ne'e. Estudu ida (Saeed & Galhos, 2017) hatudu katak porsentu 86 hosi ema LGBTQI+ sira esperiénsia forma violénsia oioin, barak hosi família no sira nia komunidade rasik. Iha peskiza ida ne'e deskobre katak 31% hosi respondente sira konfesa sai katak hetan esperiénsia amesa fíziku ka intimidasaun hosi uma laran ka família rasik, dadus ida ne'e iha diferensa ho estudu iha 2017. Diskusaun kompletu bele hare'e iha parte amesa fíziku no intimidasaun.

“Iha uma laran biasa ami ba lia ruma familia sira sempre halo hau han ikus no dalaruma haruka hau han deit iha dapur la bele ba han iha meja ho sira.” Dehan Respondente LGBTQI+ hosi Manufahi.

“Ha'u nia aman rasik obriga atu muda hau nia lalaok moris ho maneira baku no duni sai husi uma” Tenik respondente LGBTQI+ hosi Aileu.

Iha família barak maka hahu nakloke no bele simu sira-nia membru família nia identidade jéneru ka orientasaun seksuál ne'ebé la'os-bináriu, ida ne'e hatudu hosi 67.1% hosi respondente família sira ne'ebé bele simu no halo tratamentu igual ba membru LGBTQI+ sira. Durante peskiza mós, konsege halibur informasaun balun, katak la'os família hotu-hotu mak rejenta sira-nia prejença

“Ami familia ida rua mak komprende nia maibe presija informasaun ba membru familia seluk ne'ebe to agora la simu nia” Dehan respondente família hosi Manufahi.

### 1.3. Programa inkluzivu husi fornecedor servisu sira

Konstituisaun Repúblika Demokrátika Timor-Leste garante direitu fundamentál ba sidadaun hotu-hotu, nia interpretasaun ne'ebé luan liu aliña ho espíritu Deklarasaun Universál Direitus Umanus (1948) hodi kontra kualkér forma diskriminasaun, inklui hasoru comunidade LGBTIQ. Prinsípiu konstitusionál sira hanesan igualdade no direitu ba identidade pesoál bele sai hanesan fundasaun legál sira hodi hasoru dezafiu sira hanesan diskriminasaun iha servisu kuidadu saúde, edukasaun, ka empregu, enkuantu DUDU reforsa dignidade umana, protesau no kontra diskriminasaun. Maibé, implementasaun prátika sei fraku nafatin, ne'ebé nesesita esforsu judisiál, polítika, no advokasia sosiál atu aseguara garantia sira-ne'e sai realidade, partikularmente ba grupu vulneravel sira hanesan comunidade LGBTIQ, liuhosi armonizasaun lei nasional sira ho padraun direitus umanus internasionál sira.

Dalaruma, konseitu inkluzivu iha Timor-Leste nian iha implementasaun polítika Estadu, luan liu kompara ho hirak ne'ebé konsagra iha Konstituisaun RDTL. Exemplu direitu fundamental ba sidadaun sira, maske temi momós deit kona-bá fetu ho mane, maibé iha implementasaun sira fo biban ba sidadaun sira ho orientasaun seksual no espresaun identidade jeneru la'ós bináriu hodi

hola parte ativa iha prosesu dezvoltamentu sosiál iha nivél lokál to'o nasional.

Horik kedas Primeiru Ministru Rui Maria de Araújo hola posisaun klaru hodi suporta direitu LGBTIQ+, haforsa tan ho Marsa Pride dahuluk iha Timor-Leste nia kapitál, Dili, hala'o iha 29 Juñu 2017, nu'udar fundasaun forte hodi kontra kualker forma violensia no diskriminasaun sira ba comunidade LGBTIQ+ sira, nune'e bele kria kondisaun ne'ebé ema LGBTIQ sira sente konfortavel atu espresa sira-nia identidade, no bele asesu ba servisu públiku oioin ne'ebé estadu fornese nu'udar parte ida husi sira-nia direitu sidadaun nian.

Servidór públiku sira ne'ebé servisu iha instituisaun estadu nian hanesan Servisu Saúde, Edukasaun, Seguransa, Rejistu Notariadu, Servisu Komunitáriu no sira seluk tan, maka atór sira iha liña oin hodi fornese servisu esensial sira ba públiku. Sira nia partisipasaun iha peskiza ida-ne'e maka krítiku tanba sira halo interasaun direktamente ho comunidade LGBTIQ, hodi forma asesu ba kuidadu saúde, edukasaun, rekoñesimentu legál, no protesau sosiál sira. Porezemplu, fornecedor kuidadu saúde sira bele influencia apoiu saúde mentál ba indivídu LGBTIQ sira, enkuantu edukadór sira bele aborda inkluzau iha eskola sira.







Hodi entrevista ofisiál sira-ne'e, bele identifika barreira sistémiku sira (ezemplu, diskriminasaun, falta formasaun) ne'ebé difikulta prestaun servisu ne'ebé ekuitativu. Komprende sira nia perspetiva ajuda atu identifika lakuna sira entre enkuadramentu polítika sira no realidade sira iha terrenu, ne'ebé maka importante tebes atu hadi'a moris-di'ak grupu marjinalizadu sira-nian.

Ajénsia nasionál no internasionál sira hala'o papél sentrál ida iha dezeńu no implementasaun polítika sira bem-estar sosiál nian ne'ebé afeta populasau vulneravel sira, inklui comunidade LGBTIQ. Sira nia envolvimentu destaka interasaun entre advokasia globál no asaun lokalizadu, oferese hanoin sira kona-ba oinsá mudansa sistémiku bele hasa'e moris-di'ak LGBTIQ nian.

Fornesedor servisu sira ne'ebé define iha peskiza ida ne'e maka funsionáriu públiku estadu nian (servidor públiku) no funsionáriu organizaun naun-govermentál sira hosi ajensia nasionál no mós ajensia internasionál sira.

To'o 41.3% hosi fornecedor servisu sira hatete katak sira nia instituisaun fornese programa

sira ne'ebé foka ba direitus umanus, direitu LGBTIQ+ no kestaun jéneru ba comunidade. Entretantu, 18.8% seluk hatete katak sira la hala'o programa hanesan ne'e, no besik 40% la fornese resposta ida ne'ebé klaru. Kondisaun ida-ne'e reflète ezisténsia inserteza ka falta klareza iha implementasaun programa sira ne'ebé apoia direitu LGBTIQ+ iha instituisaun sira-ne'e.

Ida-ne'e bele deit kauza hosi fatór oiain. Primeiru, iha nafatin falta komprensaun, ka falta konxiénsia entre fornecedor servisu balu kona-ba importánsia husi programa inkluzivu sira ne'ebé suporta direitu LGBTIQ+, liuliu iha comunidade sira ne'ebé iha tendénsia atu sai konservativu, ka iha hanoin negativu kona-ba comunidade ida-ne'e. Segundu, instituisaun balun iha rekursu limitadu, tantu iha termu finansiamentu no formasaun ba pesoál sira hodi fornese servisu inkluzivu.

## 2. ANALIZE BEM ESTAR MEMBRU LGBTIQ

### 2.1. Traballu

Iha Timor-Leste, comunidade LGBTIQ hasoru dezafiu signifkativu, tantu hosi perspetiva sosiál no ekonómiku, inklui dezafiu boot hodi asesu ba oportunidade empregu ne'ebé estável, sustentável no inkluzivu. Tuir estudu hosi Sara

Niner iha 2018, maske la kriminaliza, estigma sosiál, asédiu no violénsia sai komun nafatin ba ema LGBTIQ sira. Dominasaun hosi maskulini-dade hegémónika agresivu ida ne'ebé kombina ho atitude negativu sira hasoru omoseksualidade ne'ebé adota hosi Igreja Katólíka destaka serbisu krusiál ne'ebé presiza atu kombaté iha nivel signifikativu ida hosi intoleránsia ne'ebé harii hosi forsa konservadór sira-ne'e (Niner, 2018). Parte seluk, iha eskola sira laiha hanorin kona-bá edukasaun seksuál ne'ebé komprensivu no inkluzivu, pois, menus apoia polítika ka programa ruma ne'ebé indika direta ba direitu LGBTIQ sira, halo comunidade ida ne'e sai vulneravel liu-tán, no difisil tebes kompete iha merkadu traballu formál sira, nune'e iha balun decide halo servisu informal sira hanesan vendédór ambulante, empregadu doméstiku, kostureiru ka alfayate, agrikultura no peskador, no seluk tan, ne'ebé sira-nia rendimentu nunca estavel.

Dadus kona-ba estatutu empregu comunidade LGBTIQ iha Timor-Leste hatudu katak 20% servisu tempu-tomak iha setór privadu hanesan servisu iha kosmetika, Spa no Massagem, loja sira, restaurante no seluk tan; tuir fali 16.8% ho servisu tempu partiál iha setór hanesan. Setór privadu parese hanesan fornecedor prinsipál ba empregu, maski empregu iha nia laran bele laiha estabilidade ka garantia mínimu ba direitu traballadór sira-nian. To'o 11% sei iha hela edukasaun ka formasaun, ne'ebé refleto esforsu atu hasa'e abilidade hodi tama iha merkadu traballu. Maibé, taxa 13.5% maka hateten katak dadaun ne'e sira laiha servisu ou partisipa iha treinamentu ka kapasitasaun ruma, no 12.9% ne'ebé hili atu la responde sujere ezisténsia barreira estruturál hanesan diskriminasaun, asesu limitadu ba empregu formál, ka inserteza ekonómika ne'ebé grupu ida-ne'e esperiénsia.

Partisipasaun hosi comunidade LGBTIQ iha setór públiku ki'ik tebes, ho de'it 7.1% maka serbisu tempu-tomak iha instituisaun publiku sira hanesan funsionáriu públiku, professor ka edukadór sira, profissaun saúde nian, forsa seguransa sira, servisu area justisa nian, inklui mos servisu iha assisténsia sosial nian.

Dadus ida-ne'e indika prejuizu potenciál iha rekrutamentu ka kultura serbisu ne'ebé la inkluzivu. Iha setór informál, 3,9% serbisu hanesan agrikultór no 7,1% hanesan empreezáriu independente, área rua ne'ebé vulnerável ba xoke ekonómiku no iha protesau sosiál mínimu tebes. Taxa partisipasaun iha atividade voluntariu 3.2% deit hatudu mos espasu limitadu ba partisipasaun sosiedade sivil ba grupu ida ne'e. Persentajen aas hosi "la hatán" iha 12.9% bele sai hanesan reflesau ida hosi estigma ka desconfortu iha divulgasaun estatutu empregu nian, liuliu iha norma sosiál sira nia leet ne'ebé tabu nafatin identidade LGBTIQ sira. Dadus ida-ne'e subliña importánsia hosi polítika sira ne'ebé loke asesu ba serbisu dignu, hametin protesau sosiál, no halakon diskriminasaun sistémiku iha setór ekonómiku hotu-hotu.

Komunidade LGBTIQ iha Timor-Leste hasoru obstákulu sosiál no estruturál oioin ne'ebé difikulta sira hetan serbisu. Estigma kulturál no relijiozu ne'ebé maka'as iha sosiedade dala barak hamosu diskriminasaun ne'ebé nakloke iha servisu fatin, tantu hosi kolega sira no superiór sira. Individu LGBTIQ hasoru dezafiu barak hodi hetan asesu ba edukasaun (Human Right Adviser's Unit - UNRCO Timor-Leste, 2022) no mós hetan obrigasaun hosi familia atu hapara sira nia edukasaun hodi halo servisu ne'ebé ladún di'ak (Saeed & Galhos, 2017), ne'ebé limita sira nia asesu ba edukasaun no formasaun abilidade sira ne'ebé presiza atu kompete iha merkadu traballu.

Dadus hirak ne'e refleto comunidade ida ne'e nia asesu limitadu ba empregu formál no oportunidade ekonómika. Proporsau ne'ebé ki'ik tebes iha setór públiku bele indika katak diskriminasaun bazeia ba orientasaun seksuál ka identidade jéneru bele sai hanesan barreira atu tama iha sistema sira ne'ebé estruturadu liu, até barak maka sei subar hela sira-nia identidade ka orientasaun seksual tanba razaun sosiál no ekonómiku (Niner, 2018). Entretantu, maski setór privadu fó oportunidade barak liu, número 20.0% nafatin representa dezafiu signifikativu, no ezisténsia 7.1% ne'ebé iha sira-nia negósio



rasik hatudu inisiativa independente atu hetan fonte rendimentu, maski bele iha eskala ki'ik ka limitadu hosi rekursu.



2017 hau ba Indonesia, hau buka servisu iha ne'ebá, no hau loke salon, dekorasi, Catering hahan, no hau nia familia rona katak ha'u susesu ona no sira komesa simu fali hau nia identidade, sira ko'alia katak maske nia mak



## 2.2. Rendimentu

Dadus kona-ba rendimentu kada fulan husi komidade LGBTIQ iha Timor-Leste hatudu diferensa signifikante, ho maioria porsentu 48.4 hetan rendimentu menus husi 100 USD kada fulan. Númeru ida-ne'e ki'ik kompara ho saláriu mínimu nasional 115 USD, ne'ebé reflète kondisaun ekonómika ne'ebé fragil tebes. Maioria membru komidade ida-ne'e moris iha kiak nia laran ka servisu iha setór informál ho saláriu ne'ebé ki'ik, ne'ebé la prienxe padraun neseseidade báziku, situaun ne'e difisil liu tan wainhira pandemia COVID-19 Estadu Timor-Leste halo izolamentu sosial ne'ebé implika ba grupu vulneravel ho taxa 97.7% sira-nia rendimentu la to'o 50.00 USD kada fulan (Chen, 2020).

Porsentu 27,1 seluk iha rendimentu entre 101 no 150 USD kada fulan, maski nato'on, maibé sei iha linea saláriu mínimu no susar atu hatan ba neseseidade moris, liuliu se sira tenke sustenta família membru família seluk. Porsentu 1.3 ki'ik de'it maka manán entre 501 no 1000 USD, no porsentu 0.6 ki'ik tebes manan liu 1000 USD kada fulan. Ida-ne'e indika katak númeru ki'ik tebes hosi membru komidade LGBTIQ sira maka iha asesu ba serbisu sira ho saláriu di'ak ka pozisaun profesionál sira ne'ebé estável.

Rendimentu ki'ik hosi maioria komidade LGBTIQ iha implikasaun sériu ba sira nia moris-di'ak no estabilidade. Ho rendimentu menus hosi 100 USD kada fulan, ema barak luta atu hatán ba neseseidade báziku sira hanesan ai-han, hela-fatin no kuidadu saúde, liuliu konsidera katak gastu padraun médiu kada ema ida iha Timor-Leste por volta de 46.37 USD kada fulan (Relatóriu TLSLS-3 2014). Ba sira ne'ebé tenke sustenta sira-nia família, rendimentu ne'e klaru la suficiente. Dezigualdade rendimentu ida-ne'e mós reflète diskriminasaun sistémiku iha merkadu traballu, iha ne'ebé ema LGBTIQ sira dalabarak halo empregu informál ka ho saláriu ki'ik tanba estigma no falta protesau legal.



Jeralmente, dados sira-ne'e subliña nesesidade ba intervensaun polítika sira ne'ebé kria oportunidade empregu ne'ebé justu, aumenta asesu ba rendimentu ne'ebé di'ak, no garante protesauun sosiál ba comunidade LGBTIQ.

Maski comunidade LGBTIQ iha Timor-Leste hasoru dezafiu ekonómiku, dados hatudu katak sira iha estratéjia oioin ba sobrevivénsia. To'o 40% hosi sira depende ba sira nia saláriu rasik hodi hatán ba sira nia nesesidade loroloron nian, ne'ebé refleto sira nia aten-barani no determina-saun atu sai independente, maski iha kondisaun ekonómika ne'ebé difisil.

Aleinde ne'e, 12.3% husi sira depende ba rendimentu husi agrikultura no serbisu prekáriu sira seluk, ne'ebé indika sira-nia ligasaun ba setór informál no esforsu atu esplora potenciál lokál. Maibé, situasaun ida ne'e mós hatudu inserteza rendimentu ne'ebé bele agrava sira nia vulnerabilidade ekonómika.


Iha parte seluk, liu 1/3 hosi comunidade ida-ne'e depende nafatin ba apoiu inan-aman nian ba sobrevivénsia. Ida-ne'e hatudu katak, iha esforsu independente nia leet, apoiu família nian sai nafatin apoiu prinsipál ba sira. Maibé, dependénsia ida-ne'e mós indika dezafiu sira ne'ebé luan liu iha sira nia asesu ba serbisu ne'ebé di'ak no sustentável. Kondisaun sira-ne'e dala barak sai aat liután tanba diskriminasaun sosiál no asesu limitadu ba oportunidade empregu ne'ebé iguál.

Estigma kona-ba orientasaun seksuál no identidade jéneru dalabarak sai obstákulu ba sira atu hetan serbisu ne'ebé di'ak ka hadi'a sira nia padraun moris. Nu'udar rezultadu, barak mak dadur iha siklu pobreza nian, ho asesu uitoan de'it ba servisu báziku, edukasaun ka formasaun ne'ebé bele hasa'e sira-nia kapasidade.

Estigma kona-ba orientasaun seksuál no identidade jéneru dalabarak sai obstákulu ba sira atu hetan serbisu ne'ebé di'ak ka hadi'a sira nia padraun moris. Nu'udar rezultadu, barak mak dadur iha siklu pobreza nian, ho asesu uitoan de'it ba servisu báziku, edukasaun ka formasaun ne'ebé bele hasa'e sira-nia kapasidade.

### 2.3. Familia, Hela fatin no Edukasaun

Hosi respondente 155, maioria ho 48.4% maka sei hela ho familia sira, inklui hela ho membru família sira iha 27.1%. Dados ne'e hatudu katak, comunidade LGBTIQ sei iha nafatin dependensia ba família kona-bá sira-nia hela fatin. Iha fali distribuisaun nivel estudu hosi respondente nian, iha 7.1% maka la fó resposta ho razaun sira nunka eskola eh la remata ensinu primária. No existe 5.8% maka dadaun ne'e iha hela banku estudu iha nivel sekundariu no superior (tersiariu nian).



Ironia tebes ba comunidade LGBTIQ sira, tanba kuaze 1/3 maka la konsege remata sira nia estudu, ho maioria maka para eskola iha nivel pre-sekundaria (Ensinu Baziku terseiru siklu), nu'udar relata hosi Rede Feto and ASEAN SOGIE Caucus iha 2017 katak membru LGBTIQ sira la hetan suporta morál hosi sira-nia familia rasik fiar katak "ema hanesan sira" la merese hetan edukasaun formál tanba sei labele hetan servisu ne'ebé di'ak.

Razaun seluk sira para ka abandona eskola, maka fatór ekonómia, sai hanesan kauza prinsipál ho porsentu 42.9. Iha família barak labele selu edukasaun tanba kiak, obriga membru LGBTIQ sira atu husik eskola no buka serbisu hodi ajuda família finanseiramente. Alem ida ne'e, porsentu 11.9 relata katak sira nia família la fó apoiu, tantu finanseiramente ka emosionalmente, tanba estigma hasoru identidade LGBTIQ sira. Diskriminasaun direta iha ambiente eskola nian ms sai nuudar fatr signifikativu ida, ho porsentu 7.1

hatete katak sira hetan diskriminasaun neeb halo sira la konfortavel ka la seguru atu kontinua tuir eskola. Problema saúde ne'ebé difikulta prezensa iha eskola relata hosi respondente porsentu 7,1, enkuantu porsentu 23,8 sente la konfortavel ho farda eskola nian ka regra sira ne'ebé la akomoda sira-nia espresaun jéneru. Totál porsentu 7.1 hili atu la hatán, ne'ebé bele refleto laran-taridu ka tauk hodi fó sai razaun loloos. Jeralmente, kombi-nasaun presaan ekonómika, diskriminasaun, no falta apoiu família nian kria ambiente ida ne'ebé ladún fó apoiu ba comunidade LGBTIQ atu kompleta sira nia edukasaun.

Iha presupostu maka'as, katak família sira ne'ebé ho rendimentu ekonómiku natón, deside la supor-ta sira-nia oan ne'ebé iha identidade jéneru la binariu (non-binary gender) sira, atu asesu edukasaun kontinuidade.

### 3. IDENTIDADE JENERU, ORIENTASAUN SEKSUAL NO DISKRIMINASAUN SOSIAL

#### 3.1. Jeneru no Seksualidade

Iha tinan 2001, maioria membru Assembleia Konstituente RDTL deside atu hasai fraze "orientasaun seksual" husi Artigu 16 esbosu konstituisaun ne'ebé hatuur prinsípiu anti-diskriminasaun. Iha inisiu, artigu sira kobre aspetu oioin kona-ba anti diskriminasaun, inklui "kór kulit, rasa, jéneru, orientasaun seksuál, orijen étnika, estatutu sosiál no ekonómiku, fiar ka konviksaun polítiku, reliji-aun, edukasaun, no kondisaun fíziku no mentál". Iha prosesu votasaun, membru 52 hosi 88 apoia hodi hasai liafuan ne'e, ne'ebé ikus mai sei fó impaktu ba assuntu inkluzividade, no rekoñesim-entu ba direitu forma família ho seksu hanesan, no mos halo rejistu notariadu ka dokumentu ofisiál tuir sira nia identidade loloos iha Timor-Leste.

Dadus hosi peskiza ida ne'e revela kompleksidade identidade jéneru iha comunidade LGBTIQ iha Timor-Leste. 56.1% hosi respondente sira rejistu iha sertidaun moris nu'udar mane, no 45.2% nu'udar feto. Maibé, identidade jéneru ne'ebé sira hili atu rekoñese, la sempre koresponde iha sertidaun moris nu'udar mane, no 45.2% nu'udar feto. Maibé, identidade jéneru ne'ebé sira hili atu rekoñese, la sempre koresponde ba jéneru ne'ebé

hateten iha dokumentu ofisiál sira, distribuisaun resposta sira hatudu diversidade ne'ebé refleto sira-nia esperiénsia pesoál. Luta hosi comunidade Lesbian, Gay, Bisexual, Transgender, Intersex, non-binary & Queer, ne'ebé maka reprezenta 72.3% hosi respondente sira, refleto sira nia aten-barani hodi dezafia norma sosiál sira no luta ba direitu atu espresa sira nia identidade jeneru.

Bainhira halo korelasaun entre dadus identidade jéneru nian no orientasaun seksuál, deskreve komplementa esperiénsia sira hosi comunidade ida-ne'e. Ezemplu, ema ida ne'ebé moris nu'udar mane bele identifika hanesan feto transjéneru no homoseksuál "gay", ne'ebé indika kompleksidade úniku iha sira nia viajen identidade pesoál. Respondente balun ne'ebé identifika hanesan feto iha atrasaun seksuál ba feto sira seluk, ne'ebé jeralmente koñesidu hanesan lésbika. Iha parte seluk, ida-ne'e mós akontese ba indivídu sira ne'ebé identifika hanesan mane, maibé hatudu atrasaun seksuál ba jéneru feto no mos mane, ka bele mós rejeteja katégoria orientasaun seksuál padraun, inklui queer.

Fenómenu ida-ne'e refleto katak identidade jéneru no orientasaun seksuál la'ós sempre aliña ho norma ka dikotomia binária sira ne'ebé maka dalabarak sosiedade sira assume. Hateke hosi sikun seluk, ne'e hanesan espektru luan ida ne'ebé ema ida bele espresa sentimentu, esperiénsia no relasaun sira.

Iha 41,9% hosi respondente sira deklarara katak sira la iha parseiru/a, ne'ebé bele halo sira dependen-te liu ba apoiu família nian. Iha parte seluk, 24.3% ne'ebé hateten katak iha doben ka namora hela, no 14.2% ne'ebé uniaun faktu katak sira iha parseiru maibé la hela hamutuk mós indika katak limitasaun sosiál, ekonómika ka kulturál influen-sia sira-nia desizaun atu hela nafatin iha uma família nian, maski sira iha relasaun romántiku, no mós iha porsentu 5.8 maka hela ho parseiru mane no porsentu 4.5 maka hela ho parseiru feto. Seluk, iha porsentu 3.2 maka hateten katak dadaun ne'e sira faluk no restu la fó resposta. Informasaun hirak ne'e mós subliña importánsia atu kria ambiente sosiál ida ne'ebé bele aseita no apoia comunidade LGBTIQ, hodi bele iha espe-



riénsia relasaun sira la ho presau hosi estigma ka diskriminasaun. Relasaun sira ne'ebé saudavel no estável maka elementu importante ida ba ema ida nia moris-di'ak emocionálmente.

Hau familia sira hatene hau ema ne'ebé mak lesbi-an namora ho transjeneru mane, entaun iha momentu 2015 hau nia familia baku no hasai hau husi eskola, no iha momentu ne'ebá hau senti mesak, hau buka dalan oinsa atu halai se'es husi hau nia familia. Kalan ida hau toba dukur sira lori mane mai sulan iha hau nia kuartu hodi peskosa hau no sira dehan halo hanesan ne'e para nia sei tauk mane ka lae... hau toba hakfodak buat hotu liu tiha ona, hau atu oho a'an maibe la diak hau buka meius oinsa atu sai husi uma, entaun hau ko'alia ba hau nia parseiu nia mai foti hau subar iha uma, hau halai husi uma kalan oras 12:00 halai ba hau nia parseira nia knua, liu tia semana rua hau foin hatene katak hau isin rua... hau tanis atu halo nusa, hau tenki simu realidade ida ne'e ona, no iha 2020 hau kontaktu fali hau nia familia katak hau iha bebé oan feto ida ne'ebé imi haruka ema halo hau nia isin foer tiha, no iha momentu

ne'ebá ha'u nia familia tanis husu deskulpa hodi buka tuir hau ho bebe atu fila mai fali hau nia familia, no sira simu fila fali hau ho hau nia bebé no mos hau nia parseira, husi ne'e kedas sira simu ami nain tolu to'o agora ami moris felíz.

História membru LGBTIQ husi Dili


### 3.2. Diskriminasaun sosial ba comunidade LGBTIQ

Dezafiu mais kompleksu relasiona ho sira-nia orientasaun seksuál, identidade jéneru no auto-espresaun, maka diskriminasaun iha assuntu oi-oin, inklui la sente livre espresa sira nia an iha fatin públiku, hetan abuzu verbál no fízika, to'o hetan diskriminasaun iha asesu ba servisu báziku sira. Rezultadu levantamentu hatudu katak maioria hosi respondente sira, nomeadamente 61.9% iha fulan 12 nia laran, sente katak sira hetan diskriminasaun tanba sira-nia orientasaun seksuál ka identidade jéneru.



Hosi porsentu 61.9 ne'ebé hateten katak sira hasoru diskriminasaun, iha proporsaun 49.7% hosi komunidade LGBTIQ iha Timor-Leste hateten sempre hasoru diskriminasaun iha aspetu oioin iha sira-nia moris, inklui sira hetan goza bebeik iha fatin públiku, rejeisaun hosi família balun, asédiu verbál no fíziku, diskriminasaun iha empregu, no estigma iha edukasaun, relijiaun no servisu públiku sira.

**Ita boot hasoru problema tanba ita nia orientasaun sexual, identidade jeneru ka expresaun?**



Totál 27.7% hosi indivídu sira relata sei konfuzan kona-ba sira-nia identidade jeneru, ne'ebé refleto falta edukasaun adekua ka apoiu psikososial. Entretantu, asédiu verbál maka forma violénsia ida ne'ebé maka esperiénsia bebeik liu, ne'ebé maka relata hosi 25.2% hosi respondente sira.

Relasaun ho família mós sai hanesan dezafiu boot ida, ho 22.6% hosi respondente sira hetan rejeisaun hosi sira nia membru família rasik. Situasaun ida-ne'e difikulta sira atu hetan apoiu emosional, liuliu iha sosiedade ida ne'ebé depende maka'as nafatin ba ligasaun familia nian. Violénsia fízika no seksuál, maski taxa sira ki'ik liu duké forma sira seluk, sai nafatin ameasa ida ne'ebé real. Totál 10.3% hosi indivídu sira relata violénsia fíziku, no 9.0% hetan asédiu seksuál.

**3.3. Diskriminasaun sira hosi pontu vista Familia no Fornesedor servisu**

To'o 60.8% hosi família sira hosi grupu LGBTIQ sira hatene katak sira nia membru familia LGBTIQ sira tenke hasoru dezafiu moris nian ne'ebé maka'as, hosi difikuldade atu asesu ba edukasaun no saúde no servisu sosial sira seluk tanba de'it sira nia identidade jeneru. Entretantu, 51.3% hosi fornecedor servisu sira mós rekoñese realidade moruk ne'e, katak ema LGBTIQ sira kontinua hasoru obstákulu oioin ne'ebé impede sira atu hetan direitu báziku. Maioria hosi fornecedor servisu sira iha Timor-Leste, nomeadamente 49%, rekoñese katak presiza iha política spesífiku no forte atu proteje komunidade LGBTIQ hosi diskriminasaun no dezafiu sira ne'ebé sira hasoru.



Maibé, 14% hosi forneseedor servisu sira hatete katak iha ona polítika inkluziun sira hanesan GEDSI (Gender Equality, Disability, and Social Inclusion) ne'ebé dezeńa atu hamenus diskriminasiun hasoru grupu vulneravel sira, inklui komidade LGBTIQ sira. Maski nune'e, parte barak sei fiar katak implementasiun polítika GEDSI ne'e presiza nafatin atu hadi'a, tanba padraun sosiál iha komidade lokal sira ka sosiadade indijena barak rekoñese no aseita liu fali bináriu simples ba espresau jéneru nian (Niner, 2018), inklui influensia bo'ot hosi Igreja Katólíka nian.

#### 4. KRIME SIRA HASORU KOMUNIDADE LGBTIQ

##### 4.1. Ameasa, intimidasiun fíziku no Violensia fíziku hasoru komidade LGBTIQ


Iha peskiza hosi Rede feto & ASEAN SOGIE 2017, kona-bá Feto Lésbika no Biseksuál sira nia moris no transgender mane iha Timor-Leste, maioria respondente sira esperimenta asédiu fíziku, maske la'os respondente hotu-hotu maka ko'alia, tanba la barak maka sente konfortavel atu ko'alia kona-ba asuntu sira-ne'e ho nakloke, maibé wainhira halo interasiun naktakan sira mosu forma violénsia partikularmente viziózu balu, ho sira-nia família nu'udar autór xave sira (Saeed & Galhos, 2017). Iha rezultadu levantamentu ne'e hatudu katak ameasa fíziku no intimidasiun nafatin sai realidade ne'ebé komidade LGBTIQ hasoru iha Timor-Leste. 16.1% hosi respondente membru LGBTIQ sira dehan katak sira dalabarak hetan ameasa fíziku sira hosi kiik to'o grave, enkuantu 31.0% seluk hateten sira hasoru ona ameasa ka intimidasiun, maski intensidade ne'e ladún akontese.

Númeru sira-ne'e reflète katak, maski la'ós indivídu hotu-hotu iha komidade sira-ne'e hetan ameasa direta, preokupasiun sira kona-ba seguransa fíziku no saude mentál sai nafatin kestaun ida ne'ebé importante tebes. Situasiun ida-ne'e subliña importánsia hosi protesiun legál ne'ebé maka'as liu, implementasiun hosi polítika sira anti-diskriminasiun nian, no kampaña sira hodi enkoraja konxiénsia públiku nian kona-ba direitu no dignidade hosi komidade LGBTIQ.

37.5% hosi forneseedor servisu sira hatene katak komidade LGBTIQ+ hetan asédiu seksuál, ameasa, intimidasiun, violénsia fíziku no violénsia seksuál. Iha nivel família, persentajen ida-ne'e aas liután, ho 55.7% hosi respondente família sira admitti katak sira hatene membru LGBTIQ+ sira ne'ebé hasoru situasiun sira hanesan ne'e.

Fatin ne'ebé importante tebes ba ema maka uma, maibé, 31% hosi respondente sira konfesa sai katak sira hetan esperiénsia ameasa fíziku ka intimidasiun hosi sira nia sirkulu família rasik, ne'e reflète profundidade hosi diskriminasiun ne'ebé akontese, maski iha ambiente sira ne'ebé tuir loloos sai fatin seguru no mos sira bele hetan apoiu no motivasiun ba moris diak.

Iha neebe mak ita hetan ameasa fíziku ka intimidasiun?



Intimidasiun sira iha fatin públiku sira, inklui merkadu, loja no eskola sira, maski ho número ne'ebé ki'ik liu maibé significativu nafatin. Ida-ne'e hatudu katak dezafiu sira eziste nafatin iha kriasiun ambiente ida ne'ebé seguru ba komidade LGBTIQ iha aspetu oiain moris sosiál nian. Diskriminasiun no intimidasiun iha fatin sira-ne'e, subliña neseseidade ba konxiénsia no mudansa kle'an liután iha nivel sosiadade atu nune'e ema hotu, bele sente moris ho seguru no dignu.

To'o 65.8% hatete katak sira la hetan violénsia fíziku iha fulan 12 nia laran tanba sira nia orientasiun seksuál. Enkuantu ida-ne'e hatudu katak maioria la hasoru violénsia direta, número sira-ne'e la nega faktu katak ameasa no violénsia akontese nafatin entre grupu vulneravel balu. Importante ba sosiadade no ema sira ne'ebé halo polítika atu haforsa medida protesiun sira atu violénsia ne'e bele minimiza ka halakon kompletamente.

#### 4.2. Proporsan violénsia tuir identidade jeneru no autor sira

Ema LGBTIQ+ esperiénsia forma violénsia oioin bazeia ba sira-nia identidade jeneru no orientasaun seksuál. Transjeneru mane sira dalabarak hasoru violénsia hosi família no komunidade sira ne'ebé hakarak "hadi'a" sira nia identidade, enkuantu transjeneru fetu sira vulneravel liu ba asédiu no atake fíziku sira iha espasu públiku sira. Individu sira ne'ebé non-binary no queer maioria laiha esperiénsia diskriminasaun sosiál tanba sira la konforme ho norma jeneru bináriu ne'ebé forte iha sociedade.

Violénsia ida-ne'e sai aat liután tanba estigma kulturál, norma konservadór sira, no falta prote-saun legál ne'ebé klaru ba ema LGBTIQ+ sira.

Vítima barak mak la relata violénsia ne'ebé sira esperiénsia tanba sira tauk estigma ka la fiar siste-ma legál. Iha kazu balu, vítima maka hetan kulpa ka obriga atu "arrepende". Maski nune'e, grupu advokasia sira no organizasaun sociedade sivíl sira kontinua luta atu hasa'e konxiénsia, hametin protesau legál sira, no kria ambiente ida ne'ebé inkluzivu liu ba identidade jeneru no orientasaun seksuál hotu-hotu.

Proporsan violénsia tuir identidade jeneru			
	Transgender fetu	Transgender mane	Non binary & Queer
Lae	59.6%	66.7%	91.7%
Sim, dalabarak	13.5%	4.2%	8.3%
Laiha resposta	0.0%	6.3%	0.0%
Sim, dalaruma	26.9%	22.9%	0.0%

Hosi tabela ida, hatudu katak Transgender fetu sira iha risku liu hetan violénsia fíziku kompara ho transgender mane sira ou non binary & queers, ne'e akontese tanba sociedade sira fiar katak ema ne'ebé moris mai hanesan mane labele mamar hanesan fetu, ka mane sira labele sai hanesan transgender fetu.

Valór patriarkal ne'ebé Iha sirkulu sira ne'ebé besik liu ho individu LGBTIQ, Maun ka Bin nu'udar autór ne'ebé dominante liu ho pursentu 60.0 hosi respondente katak sira esperiénsia violénsia fíziku hosi maun-bin-alin rasik. Imajen ida-ne'e ilustra katak violénsia dalabarak akontese iha ambiente família nian ne'ebé besik, liuliu

hosi mane sira ne'ebé tuir loloos sai protetór, maibé sai ameasa ba sira. No iha pursentu 24.4 maka konfesa katak, inan ka aman maka autór ne'ebé fó kastigu fíziku ba individu LGBTIQ sira, hatudu katak ladún iha kuidadu hosi Inan ka Aman ba sira-nia oan rasik ne'ebé iha orientasaun seksuál la'ós binária.

Seluk hosi ne'e, iha 37.8% hosi respondente sira hateten violasaun sira ne'e mai hosi ema ne'ebé sira konese, no Ema ne'ebé la konese iha 35,6% okupa pozisaun tuir mai. Ne'e hatudu katak violénsia la'ós de'it mai hosi ema ne'ebé besik sira. Autór sira seluk maka membru família seluk iha 35.6%, kolega eskola iha 8.9%, no alin iha 8.9%. Ida-ne'e hatudu katak ámbitu violénsia nian inklui relasaun interpesoál oioin, tantu iha família, eskola no komunidade sosiál sira seluk

Sira dehan halo moe mane, lori fatuk tuda, tafui kaben, no barak los. (Transgeneru fetu hosi Bobonaro)

#### 4.3. Perspektiva krime no protesau lei hosi familia no fornecedor servisu

Maski maioria fornecedor servisu sira ho 61.3%, no 87.3% hosi família sira hatene katak diskriminasaun hasoru ema LGBTIQ nu'udar krime ne'ebé viola direitus umanus, maibé iha nafatin balun ne'ebé seidauk komprende ida-ne'e.

Primeiru, falta edukasaun no informasaun adekuadu kona-ba direitus umanus no lei sira ne'ebé proteje direitus umanus. Komunidade barak, inklui fornecedor servisu no família balu, karik laiha asesu ba informasaun legál ka kampaña sensibilizasaun ne'ebé efektivu. Segundu, norma no tradisaun kulturál ne'ebé forte dala barak forma vizaun negativu kona-ba komunidade LGBTIQ.

Terseiru, lei anti-diskriminasaun sira la aplika ho konsistente, sociedade iha tendénsia atu la hanoin to'o iha konsekuénsia hosi asaun diskriminatóriu sira, ne'ebé bele estraga bem-estar psikolojia ema ida nian, iha aspetu ne'e maka ba komunidade LGBTIQ sira.



Konxiénsia kona-ba lei sira ne'ebé proteje ema hotu-hotu, inklui ema LGBTIQ, sei relativamente ki'ik, liuliu entre forneseedor servisu sira no família sira. Dadus hatudu katak 37.5% de'it hosi forneseedor servisu sira maka komprende ezisténsia hosi lei ne'e, enkuantu entre família hosi membru LGBTIQ sira, nível komprensaun nian atinje de'it 41.8%.

Menus komprensaun kona-ba anti-diskriminasaun, tantu forneseedor servisu sira no família sira bele kontribui ba prátika diskriminatóriu sira ne'ebé kontinua.

## 5. KONDISAUN & LALA'OK SAUDE

Kondisaun saúde fíziku ema LGBTIQ nian, liuliu sira ne'ebé relasiona ho moras venérea (ou area genital), sai mós preokupasaun importante ida. Grupu oiain iha komunidadade LGBTIQ, liuliu mane sira ne'ebé halo relasaun seksuál ho mane sira no ema transjéneru sira, iha risku boot liu ba esposizaun ba moras sira ne'ebé hada'et liuhosi relasaun seksuál (MHRS) hanesan HIV/SIDA, gonorreia, sífilis no hepatite.

Fatór risku sira-ne'e bele kauza hosi buat oiain, inklui prátika seksuál sira ne'ebé laiha protesasaun, diskriminasaun iha servisu saúde nian, no laiha asesu ba informasaun no facilidade prevensaun nian ne'ebé apropiadu.

### 5.1. Moras venerea sira


Moras venéreu, ka moras hada'et liuhosi relasaun seksuál (MHRS), refere ba infesaun sira ne'ebé bele hada'et liuhosi kontaktu seksuál, bele vajinal, anál, ka orál. Moras Venerea dala barak bele hamosu komplikasaun grave sira se la hetan tratamentu kedas, hanesan infertilidade, estragu ba órgaun sira, ka aumenta risku ba transmisaun HIV.

Iha levantamentu ne'e, halo simples deit ba informasaun konkretu sira ne'ebé fasil ba komunidadade LGBTIQ sira komprende, tan peskizadór sira la halo ezaminaun saude hodi halo diagnostiku tuir area médiku nian.

Persentajen ki'ik ida hosi komunidadade LGBTIQ relata esperiénsia sintoma sira ne'ebé indika infesaun transmisaun seksuál. Besik 5% rekoñese katak sira sente moras durante relasaun seksuál, enkuantu 7% relata katak iha ben ka morin ne'ebé la normál hosi parte jénital sira. Sintoma sira seluk ne'ebé 7% maka relata inklui bubu no katar iha órgaun seksuál sira, no mós difikuldade atu soe be'e ka halo defekasaun iha 7%.

Maioria 72%, la hetan sintoma ka karakteristikada sira ne'ebé indika moras venéreu. Maski maioria la hetan sintoma sira, importante ba sira atu






nafatin halo kontrolu saúde regulár no simu tratamentu ne'ebé apropriadu bainhira presiza. Iha presupostu ida katak respondente sira konsidera ida ne'e hanesan assuntu privada nune'e la sente konfortavel atu hateten sai iha peskiza ida ne'e, iha sorin seluk karik menus konesimentu kona-bá sira-nia saúde rasik halo respondente sira fo resposta "lae". Assuntu ida ne'e presija tebes hetan atensaun direta hosi servisu saúde nian hodi hamenus risku moras venerea iha comunidade LGBTIQ sira.

### 5.2. Assistensia medika ba comunidade LGBTIQ sira

Komunidade LGBTIQ iha direitu hanesan ho sidadaun sira seluk atu hetan asesu tomak ba servisu saúde ne'ebé adekuaudu. Direitu ida-ne'e inklui kuidadu saúde fíziku no mentál laho diskriminasaun, hanesan rekoñese iha prinsípiu direitus umanus.


**Ita ba konsulta ka hetan assistensia medika iha neebe?**



Infelizmente, iha 12.3% comunidade LGBTIQ sira ne'ebé nunca buka tratamentu médiku ba sira nia moras, ne'ebé indika falta asesu ka konsiénsia kona-ba importánsia hosi servisu saúde sira. To'o 38.1% hosi respondente sira la fornese resposta ida kona-ba ida-ne'e.

Maibé, iha parte seluk, iniciativa sira hanesan servisu sira hosi "Assosiasaun Komunitade Progressu" kontribui ona, maski ki'ik, hodi fó atendimentu ba 4,5% hosi comunidade ida-ne'e. Maioria sira seluk buka ajuda médiku iha klínika sira, sentru saúde sira no hospitál referál sira.

**Oinsa ita nia esperiensia atu asesu assistensia mediku kona ba problema ba saude reprodutiva sexual?**




Bainhira husu kona-ba sira nia konfortu iha asesu servisu médiku sira, ka konsulta ho pesoál médiku sira kona-ba sira-nia moras, maioria hosi respondente sira 67.7%, hatete katak sira sente konfortavel. 9.7% de'it maka hatete katak sira sente la konfortavel, ne'ebé indika katak nafatin iha balun maka hasoru barreira sira ka karik estigma sira bainhira buka ajuda médiku. Restu, ne'ebé laiha resposta, bele reflète dúvida ka falta esperiensia iha asesu ba servisu saude.

“Ba konsulta lakoi Sira husu "o feto ka Mane", moe karik Mai ho pergunta oi oin” (Tenik respondente hosi Covalima)

### 5.3. Stigma no diskriminasaun asesu servisu saude

Estigma negativu no diskriminasaun iha servisu saúde nian sai nafatin dezafiu boot ba komuni-

<sup>1</sup>Assosiasaun Komunitade Progressu, hanesan organizasaun naun-govermental ne'ebé nia baze iha Dili, ho area atividade sira iha munisípiu sira, dedika sira-nia-an iha fornese servisu saude públiku nian, liu-liu iha programa teste ran ba HIV nian.



dade LGBTIQ. Ema barak maka tauk ka hanoin barak bainhira hetan tratamentu ne'ebé diferente, ka simu komentáriu sensitivu hosi pessoal saúde sira.

To'o 19.4% hosi comunidade LGBTIQ admitti katak sira hetan estigma no diskriminasaun bainhira asesu ba servisu saúde sira, enkuantu maioria 62.6%, hatete katak sira la hetan idane'e. Maski número sira ne'ebé sente diskriminadu ki'ik liu, ninia prezensa reflète nafatin katak bareira ba assesu servisu saúde eziste nafatin.

Esperiénsia estigma bele iha forma komentáriu sira ne'ebé la apropriadu, menus tratamentu profesionál, ka rejeisaun atende sira-nia nesesidade médiku. Situasaun sira hanesan ne'e subliña importánsia formasaun no edukasaun ba pessoál médiku sira hodi halakon prejuizu no kria servisu saúde ne'ebé justu no inkluzivu ba ema hotu.

Transgender feto sira maka dalabarak hetan tratamentu ne'ebé la favoravel, kompara ho transgender mane ou non binary & queer. Dadus ne'e hanesan ho kestaun violasaun fiziku sira ba membru LGBTIQ iha Timor-Leste, transgender feto sira maka hetan violasaun maka'as liu tanba pensamentu patriarkal hatu'ur padraun katak mane sira tenke forte no labele mamar hanesan feto sira.

## 6. RELACIONAMENTU, SENTIMENTU, NO SAUDE MENTAL


### 6.1. Relasaun ho parseiru/a

Relasaun romántiku sira hosi comunidade LGBTIQ sira hanesan de'it ho relasaun romántiku sira seluk. Iha domin, kompaixaun, no kompromisu ne'ebé envolve. Maibé, tanba diferença sira iha identidade jéneru no orientasaun seksuál, sira nia relasaun sira dalabarak hasoru dezafiu sira.

Estigma sosiál, diskriminasaun, no falta aseitasaun hosi sociedade ne'ebé hale'u bele sai obstákulu boot sira hodi harii relasaun sira ne'ebé saudavel. Maski sira hasoru dezafiu oioun, relasaun domin hosi comunidade LGBTIQ mós iha nia furak rasik. Kaben nain LGBTIQ sira barak maka konsege harii relasaun sira ne'ebé metin no nakonu ho domin. Ho komunikasaun nakloke, apoiu malu, no aseitasaun ba sira-nia an rasik no mos sira-nia parseiru, nune'e sira nia relasaun bele dezentolve ho furak. Hanesan ho kaben-na'in heteroseksuál sira, kaben-na'in LGBTIQ sira mós prezisa serbisu hamutuk atu mantein sira nia relasaun armonia no kontente.

Respondente 52.3%, maka hatete katak sira iha parseiru/a ida. Ida-ne'e hatudu tendénsia dominante ba relasaun monógamu iha comunidade ida-ne'e nia leet. Iha 26.5% hatete katak sira laiha parseiru/a, ne'ebé indika katak porsaun ida hosi comunidade ida-ne'e prefere atu hela mesak ka la iha relasaun iha momentu levantamentu nian. Proporsaun ki'ik hosi respondente sira, hamutuk 11.6%, iha parseiru/a rua, enkuantu 7.7% iha parseiru/a liu rua. Ida-ne'e indika diversidade padraun relasaun nian iha comunidade ida-ne'e.

**Ita hela hamutuk ho ita nia parseiru ka lae?**






41.3% hosi respondente sira hatete katak sira la hela ho sira nia parseiru/a. Ida-ne'e hatudu katak maioria hosi comunidade ida-ne'e hili ka iha situa-saun ne'ebé sira la fahe hela-fatin ho parseiru/a sira. Iha kontraste, 20.6% hosi respondente sira hela ho sira-nia parseiru/a, ne'ebé refleto porsaun ki'ik hosi comunidade ne'ebé iha relasaun enkuantu moris hamutuk. 30.3% hosi respondente sira indika katak sira vizita malu de'it. Ida-ne'e refleto padraun relasaun ne'ebé la sempre hamutuk, iha ne'ebé sira la hela. Aleinde ida-ne'e, iha possibilidade katak sira ne'ebé iha parseiru liu ida prefere la hela hamutuk no vizita malu de'it, hodi mantein flexibilidade ka evita konfliktu iha sira nia dinámika relasaun.

Dadus ida-ne'e revela satisfasaun relasaun entre comunidade LGBTIQ ne'ebé iha parseiru/a. Husi respondente sira ne'ebé pelumenus iha parseiru/a ida, maioria sente kontente ho sira nia relasaun, ho 32.8% satisfetu tebes no 19.8% sente satisfetu. Maibé, 5.2% hatete katak sira ladún satisfetu, ne'ebé refleto dezafiu sira ne'ebé sira hasoru iha sira nia relasaun. Entretanto, 12.1% hili atu sai neutru, hatudu hanoin ida ne'ebé ladún pozitivu ka negativu.

Ita bele fahe oinsa ita nia relasaun ho ita nia parseiru?



Iha momento ne'e kedas (familia) sira simu ami nain tolu (oan ho parseira Lesbika) até agora ami moris felíz (Respondente husi munisipiu Dili)

Presija nota mos katak, iha 24.1% hosi respondente sira hili atu la fornese resposta sira kona-ba

sira nia relasaun. Ida-ne'e bele indika sensibilidade hosi tópiku, ka sira nia laran-rua atu fahe informasaun pesoál.

Jeralmente, dadus ida-ne'e hatudu katak maioria hosi respondente sira sente satisfetu ho sira-nia relasaun romántiku, maibé iha mós dezafiu sira ne'ebé presiza konsidera, liuliu atu garante katak relasaun sira ne'ebé eziste bele saudavel no armonia nafatin.

Frekuénsia hosi diskute malu sira entre parseiru LGBTIQ sira. Respondente barak liu ho pursentu 41.3, hili atu la fó resposta, ne'ebé bele refleto sensibilidade ka konfidensialidade iha sira-nia relasaun. To'o pursentu 33.5 hosi respondente sira hatete katak diskute malu akontese dala ruma de'it, indika katak konfliktu la'ós buat ida ne'ebé konstante iha sira nia relasaun.

Adisionalmente, pursentu 16.8 hatete katak sira ladún diskute malu, enkuantu pursentu 8.4 de'it maka relata katak konfliktu sira akontese beibeik. Ida-ne'e refleto dinámika relasaun oioin, iha ne'ebé maioria parseiru/a sira bele jere konfliktu ho di'ak ka hili atu la espresa ida-ne'e.

Maioria respondente sira ho 69.0%, deklara katak sira nunca esperiénsia violénsia fízika iha sira-nia relasaun, ne'ebé indika katak maioria relasaun sira ne'ebé sira hala'o laiha violentu. Maibé, 14.2 porsentu hosi respondente sira relata esperiénsia violénsia ho sira-nia parseiru atuál, enkuantu 7.7 porsentu admite katak sira hetan ona esperiénsia violénsia ho sira-nia parseiru anteriór, maioria hosi respondente hirak ne'e hateten katak miscommunication no deskonfia malu iha parseiru seluk sai hanesan razaun komún liu, maibé iha respondente balun maka dehan katak rendimentu no ekonomia uma laran fraku dalaruma sai hanesan fatór ne'ebé provoka violénsia akontese entre parseiru/a sira. Maske nune'e, número a'as hosi ema sira ne'ebé hatete katak sira nunca hetan violénsia refleto relasaun ne'ebé saudavel no komunikaun di'ak, mesmo que maioria LGBTIQ sira moris ho rendimentu kiik tebes, nune'e mos ho persentajen relata akontese violénsia, tantu ho parseiru atuál no uluk, hatudu katak problema sira ne'e persiste.

Fatór sira hanesan dinámika komunikasaun iha relasaun sira, estrese emosionál, norma kulturál balu, ka falta apoiu sosiál no asesu ba edukasaun kona-ba relasaun saudavel, bele sai kauza ba violénsia. Entretantu, respondente sira ne'ebé hili atu la fó resposta karik sente ta'uk, moe, ka la konfortavel atu diskute sira-nia esperiénsia, ne'ebé indika nesesidade ba aprosimasaun ida ne'ebé seguru no apoiu liu atu diskute asuntu violénsia iha relasaun sira.


### 6.2. Sentimentu negativu sira

Komunidade LGBTIQ sira jerálmente dala barak rai sentimentu negativu sira ne'ebé fó impaktu ba sira nia emosionál. Sentimentu sira hanesan triste beibeik, falta motivasaun, ka sente la hetan apresiasaun dala barak mosu tanba diskriminasaun, estigma sosiál, no presaan ne'ebé sira esperiénsia iha aspetu oioin moris nian. Kondisaun ida-ne'e refleto impaktu psikolójiku ne'ebé klean hosi tratamentu ne'ebé la justu no falta aseitasaun sosiál hosi sira nia orientasaun seksuál no identidade jéneru.

triste beibeik, falta motivasaun, ka sente la hetan apresiasaun dala barak mosu tanba diskriminasaun, estigma sosiál, no presaan ne'ebé sira esperiénsia iha aspetu oioin moris nian.

Kondisaun ida-ne'e refleto impaktu psikolójiku ne'ebé klean hosi tratamentu ne'ebé la justu no falta aseitasaun sosiál hosi sira nia orientasaun seksuál no identidade jéneru.

Ita koalia ho ema ruma wainhira sente buat hirak nee?




Wainhira komunidade LGBTIQ sira iha sentimentu negativu hanesan triste, lakon esperansa, no sente laiha folin, somente 52.3% de'it hosi komunidade LGBTIQ maka hili atu ko'alia sai kona-ba sira nia sentimentu ho ema seluk. Iha kontraste, 31.6% decide atu rai buat hotu ba sira-nia an rasik laho fahé, enkuantu restu la fó resposta.

Kondisaun sira-ne'e refleto dezafiu boot sira iha buka apoiu emosionál, ne'ebé bele hetan influen-



sia hosi tauk ba estigma ka falta ambiente seguru ida iha ne'ebé atu fahe sentimentu sira Peskiza ne'e mos hatudu katak bainhira membru sira hosi comunidade LGBTIQ hasoru difikuldade, sira iha tendénsia atu buka apoiu hosi sira-nia belun besik sira ne'ebé komprende sira nia esperiénsia dalabarak sai fatin seguru ida atu fahe sentimentu sira, hanoin sira, no dezafiu sira ne'ebé sira hasoru, inklui hala'o papél importante nu'udar fonte konfortu no forsa.



Maioria hosi respondente sira, 51.0%, hatete katak sira dalabarak sente triste iha sira nia moris. Pois, iha 31.0% hosi sira admitti katak sira lakon esperansa, enkuantu 20.0% sente hanesan sira laiha ona valór. Dadus ida-ne'e ilustra impaktu emocionál ne'ebé maka'as ne'ebé maka komuni-dade LGBTIQ esperiénsia, dala barak tanba diskriminasaun, rejeisaun no presaun sosiál ne'ebé maka sira hasoru beibeik.

sira ne'ebé komprende sira nia esperiénsia dalabarak sai fatin seguru ida atu fahe sentimentu sira, hanoin sira, no dezafiu sira ne'ebé sira hasoru, inklui hala'o papél importante nu'udar fonte konfortu no forsa.

Aleinde belun besik sira, membru familia no parseiru/a sira mós sai hanesan fonte signifi-kativu apoiu ba ema LGBTIQ sira.


Maibé, dadus hatudu katak belun besik sira sai nafatin opsaun prinsipál. Ida-ne'e bele tanba belun sira iha comunidade dala barak iha komprensaun klean liu kona-ba kestaun sira ne'ebé ema LGBTIQ sira hasoru. Deskobrimentu sira-ne'e mós hatudu katak maski iha nafatin dezafiu sira iha aseitasaun sosiál, comunidade LGBTIQ konsege harii rede apoiu ida ne'ebé forte.

Maibé, dadus hatudu katak belun besik sira sai nafatin opsaun prinsipál. Ida-ne'e bele tanba belun sira iha comunidade dala barak iha komprensaun klean liu kona-ba kestaun sira ne'ebé ema LGBTIQ sira hasoru. Deskobrimentu sira-ne'e mós hatudu katak maski iha nafatin dezafiu sira iha aseitasaun sosiál, comunidade LGBTIQ konsege harii rede apoiu ida ne'ebé forte.

### 6.3. Depresaun, Izola-an & Suisidu

Membru LGBTIQ balun hasoru estrese mentál ne'ebé maka'as tebes, no mós koko atu hakotu sira nia moris rasik. Estrese ne'ebé prolongadu tanba diskriminasaun, rejeisaun, no sentimentu izolamentu dalabarak dezenvolve ba hanoin barak ka depressaun ne'ebé klean. Iha kondisaun ida-ne'e, ema balu sente katak dalan úniku atu sai mak hakotu sira-nia terus.

Problema saúde mentál sai assuntu sensitivu ba ema LGBTIQ sira, liuliu bainhira presaun sosiál no estigma halo sira sente izoladu hosi sira nia ambiente. Deskonfortu ida-ne'e dala barak enko-rraja sira atu hadook-an hosi interasaun sosiál





sira, tantu iha família no comunidade nia laran. Bazeia ba dadus, 39.2% hosi família sira admitti katak sira nia membru família LGBTIQ dala barak izola sira-nia an ka iha difikuldade atu halibur malu ho família sira seluk. Iha nivel komunidadade, 46.3% hosi fornecedor servisu sira mós revela katak indivídu LGBTIQ sira iha tendénsia atu mesak ka hasoru difikuldade atu halo sosializasaun.

“ Iha hetan violensia emosional hanesan ema hateten hau panleru, ne'e hau sente ladun diak no hau fila uma hau sempre tanis no hau toba deit ona iha hau nia quartu laran (Membru LGBTIQ husi Ermera) ”

Maske iha peskiza ida ne'e, la hatudu informasaun ruma kona-bá comunidade LGBTIQ sira ne'ebé decide hakotu sira-nia moris, maibé, iha dadus ne'ebé sira balun konfesa katak iha hanoin atu halo suisidu tan depresaun ho hanoin barak kauza hosi injustisa sosial ne'ebé sira hasoru. Iha estudu bem-estar comunidade LGBTIQ iha Philipine, iha 18.0% mak hateten katak sira iha esperiensie hanoin atu halo suisidu, dadus iha peskiza ida ne'e iha Timor-Leste hatudu proporsaan bo'ot liu, to'o 30.3% hosi respondente sira comunidade LGBTIQ iha Timor-Leste nian admitti katak sira koko ona atu estraga sira-nia an rasik ka tenta

oho-an pelumenus dala ida iha sira-nia moris. Husi sira-ne'e, 11.0% hanoin atu halo dala ida, 7.1% dala barak ona, no 3.2% dala rua ona inklui 9.0% prefere la fo resposta. Maski maioria 69,7%, hatete katak sira nunka koko medida ida hanesan ne'e, número sira-ne'e hatudu nafatin katak kuaze 1/3 hosi comunidade ida-ne'e hasoru hela presaan psikológjiku estrordináriu ne'ebé dudu sira ba pontu ida ne'ebé perigozu tebes.

Hau nia familia la simu hau nia identidade hanesan transfeto ida, no hau mak hanesan mane boot iha uma laran, hau eskola iha universidade UNTL. Iha momento hau halo semester 7 hau atu ba estagiu iha Bali, hau nia pai la fo osan ba hau, no hau nia pai dehan Ó ho identidade hanesan aban-bainrua atu sai saida, Ó deit ho identidade hanesan ne'e, iha momento ne'ebá ne'e hau senti triste los ho hau nia pai nia hahalok sira ne'e, entaun hau sai badiu tia la tama uma. No iha momento 2022 hau mai fali uma hodi ko'alia ho hau nia pai katak atu selu hau nia eskola semester nian, no hau nia pai hatan hau dehan Ó haruka Ó nia dosente halo karta ida mai hau hodi foin mak hau selu Ó nia eskola, entaun hau sai mai liur ho mata-ben tamba mak hau nia pai halo hanesan ne'e... Iha






momento labarik sira goja hau ho lia fuan panleru, entaun hau la simu ho sira nia lia fuan ida ne'e hau tuda tia sira, no hau nia pai sai rasta hau nia liman lori hau ba sulan iha uma mamuk ida lori korenti kesi hau nia ain ho liman..., bainhira hau nia kolega atu mai vizita hau tenki hare lai hau nia pai laiha mak sira bele mai vizita hau iha uma mamuk no nakukun ida ne'e... Ha'u senti sofrimentu los ho hau nia pai nia hahalok ne'e.

### Historia Membru LGTBIQ hosi munisipiu Liquiça

Saida mak ita nia razaun hanoin atu halo asaun suisidu?



Presaun boot liu ne'ebé sente hosi komunidade LGTBIQ ne'ebé dudu sira atu hanoin ka tenta oho-an maka rejeisaun hosi familia ba sira-nia identidade, ho número ne'ebé atinji 36.4%. Fatór ida-ne'e sai dominante liu, hodi refleto sentidu klean ida alienasaun no rejeisaun nian iha ambiente ne'ebé tuir loloos sai sira nia fatin seguru.

Aleinde ne'e, 18.2% sita esperiéncia hasoru presau moris barak hanesan razaun prinsipál, enkuantu 12.1% sente labele hasoru estigma no diskriminasaun hosi komunidade ne'ebé hale'u. Razaun seluk inklui sente la simu husi an rasik (9.1%), esperiéncia violénsia seksuál (3.0%), ka fallansu iha relasaun ho parseiru (3.0%). Respondente 27.3% de'it maka hateten katak sira buka apoiu emocionál hosi ema seluk bainhira hasoru presau ka sentimentu negativu sira. Iha kontraste, 30.3% hatete katak sira la buka tulun, ne'ebé indika tendénsia atu rai problema sira ba sira-nia an rasik. Maioria boot seluk, maka 42.4%, hili atu la fornese resposta definitiva, ne'ebé bele refleto konfuzau, inserteza, ka deskonfiansa ba fonte sira apoiu nian iha sira nia sorin.

Husi rezultadu levantamentu, 36.8% de'it hosi respondente sira hatene katak iha ajénsia ka

instituisaun sira, tantu Governu no ONG nasionál no internasionál sira, ne'ebé fornese assisténsia emocionál, konfortu ka protesaun bainhira sira iha depresaun maka'as no hanoin atu hakotu sira-nia moris. Iha seluk fali, 45.8% hatete katak sira la hatene kona-ba ezisténsia hosi instituisaun sira hanesan ne'e, enkuantu 17.4% hili atu la fó resposta. Dadus ida-ne'e revela lakuna sira iha informasaun no asesu ba servisu apoiu nian ba comunidade LGBTIQ, ne'ebé maka presiza tebes atu ajuda sira hasoru krize emocionál sira.

#### 6.4 Situasaun passadu, atual no esperansa futuru nian

Komunidade LGBTIQ iha era modernu iha viajen no esperiéncia moris ne'ebé nakonu ho kór, iha esénsia sira nafatin fahe emosaun hanesan ho comunidade sira seluk.

Sente ksolok, satisfasaun moris nian, no haburas esperansa ba futuru ne'ebé di'ak liu. Maski hasoru dezafiu sosiál no emocionál oioin, membru LGBTIQ sira mós kontinua buka espasu atu espresa sira-nia an ho auténtiku no moris ho significativu.


Di'ak tebes tan agora daudaun 81.9% hosi ema LGBTIQ sira hatete katak sira satisfeitu ho sira nia moris. Maibé, iha nafatin 9.0% ne'ebé sente ladun satisfeitu no 1.9% ne'ebé hatete katak sira la satisfeitu liu. Dadus ida ne'e hatudu katak iha otimizmu boot iha comunidade ida ne'e, maski iha nafatin dezafiu sira ne'ebé presiza rezolve hodi hadi'a bem-estar ba membru sira hotu.

Iha possibilidade katak obstákulu oioin ne'ebé ema LGBTIQ sira hasoru, hanesan deskreve iha peskiza ida-ne'e, barak liu akontese iha pasadu. Ida-ne'e bele haree hosi dadus ne'ebé hatudu katak 81.9% hosi ema LGBTIQ sira sente satisfeitu ho sira nia moris atuál. Númeru sira-ne'e refleto aumentu iha moris-di'ak hosi pasadu ba presente, ne'ebé bele tanba mudansa pozitivu sira iha aseita-saun sosiál, apoiu hosi comunidade, ka asesu ba servisu sira ne'ebé inkluzivu liu.

Faktu katak 10.9% de'it maka sente la satisfeitu maski iha dezafiu sira bele atribui ba fatór oioin. Possibilidade ida maka ema iha espetativa no aspirasaun ne'ebé ki'ik, ne'ebé lori ba toleránsia ne'ebé aas liu ba kondisaun sira ne'ebé difisil.

Influénsia kulturál no relijioza sira bele mós iha papél, tanba sosiedade balu fó énfaze ba pasiénsia no aseitasaun, hodi dezenkoraja insatisfasaun nakloke. Adisionalmente, ema ida-idak bele desenvolve mekanizmu sira atu hasoru susar ne'ebé ajuda sira atu adapta no sente kontente maski hasoru susar sira. Bele mós iha falta konxiénsia kona-ba padraun moris ne'ebé di'ak liu, hodi halo ema la hatene kona-ba sira nia luta. Ikus liu, presaan sosiál no estigma bele prevene ema sira atu espresa insatisfasaun ho nakloke, tanba lamentasaun bele haree hanesan la iha agradementu. Explora liután fatór sira-ne'e bele ajuda atu komprende di'ak liután razaun subjacente sira.



Ita sente satisfaz ho ita nia moris atual?



Iha fulan sanulu resin-rua nia laran, comunidade LGBTIQ hasoru dezafiu ekonómiku no sosiál sira ne'ebé significativu. Tuir dadus, 22.6% hosi respondente sira relata katak sira iha fundu ne'ebé la sufisiente atu sosa ai-han, ne'ebé indika luta ekonómika ida ne'ebé maka'as. Adisionalmente, 9.7% hosi respondente sira admiti katak sira laiha fatin seguru atu hela kalan, ne'ebé destaka preokupaun sira relasiona ho seguransa pesoál. Falta rekursu finanseiru kombina ho inseguransa ba seguransa pesoál hatudu ba realidade difisil ida iha ne'ebé nesiedade báziku sira la hetan, hodi husik comunidade vulneravel ba susar sira seluk.

Aleinde ne'e, 12.3% hosi respondente sira relata katak laiha osan sufisiente atu sosa ai-han, ne'ebé subliña difikuldade sira ne'ebé comunidade LGBTIQ hasoru hodi hatán ba nesiedade fíziku báziku sira.





Limitasaun ekonómika sira-ne'e restrinje sira nia asesu ba servisu esensial sira no kontribui ba kondisaun moris ne'ebé ladi'ak iha jerál. Situasaun ida-ne'e bele mós refleto kestaun sosial no estruktural sira ne'ebé luan liu, hanesan falta sistema apoiu no asesu limitadu ba oportunidade ekonómika sira, ne'ebé afeta desproporsionalmente comunidade marjinalizadu sira hanesan individuus LGBTIQ sira. Dezafiu sira ne'e kontribui ba siklu pobreza no inseguransa nian, hodi sobu ema ida-idak nia abilidade atu moris ho dignidade no seguransa báziku.

Iha servisu ho rendimentu diak sai hanesan esperansa boot liu hosi membru LGBTIQ sira, inklui bele iha uma rasik hodi sira bele hela ba, nune'e sira la presija ona depende ba inan-aman bele fo espasu ba sira hodi hela hamutuk ho sira-nia parseiru/a. Ema LGBTIQ sira hasoru ona obstáku-lu barak, maibé ohin loron maioria satisfetu ho sira nia moris. Mesmu nune'e, iha nafatin esperansa ba futuru, ho mehi atu iha servisu diak, rendimentu ne'ebe estavel, no uma rasik, nune'e bele moris independente no livre la depende ba ema seluk.

#### E. KONKLUSAUN

Peskiza ida-ne'e revela katak comunidade LGBTIQ iha Timor-Leste continua hasoru dezafiu boot

sira, tantu iha forma diskriminasaun, estigma sosial no barreira estruktural sira. Violénsia no asédiu nu'udar asuntu ne'ebé presija hetan atensaun, ho 37.5% hosi forneseidór servisu sira hatene kona-ba kazu sira asédiu seksual, ameasa, intimidasaun, violénsia fízika no violénsia seksual hasoru comunidade ida-ne'e. Entretantu, 55.7% hosi família sira mós hatene katak sira-nia membru família LGBTIQ hetan ona esperiensa violénsia ne'ebé hanesan, ne'ebé hatudu katak ambiente imediatu dala barak la'ós fatin seguru ba comunidade ida-ne'e.

Kompara ho peskiza iha 2017 nian ne'ebé hatudu iha porsentu 86 maka hetan violasaun iha forma oi-oin hosi família no comunidade sira, iha peskiza ida ne'e hatudu mudansa pozitivu maske ladauk radikalmente diferensa ho porsentu 62 respondente comunidade LGBTIQ sira maka hasoru forma diskriminasaun oi-oin iha fulan 12 ikus ne'e ida ne'e hatudu mudansa pozitivu maske ladauk radikalmente diferensa ho porsentu 62 respondente comunidade LGBTIQ sira maka hasoru forma diskriminasaun oi-oin iha fulan 12 ikus ne'e.

Komprensaun kona-ba direitu legal sira atu proteje comunidade LGBTIQ mós seidauk adekua. Forneseidór servisu 37.5% de'it no família 41.8% de'it maka hatene kona-ba lei sira ne'ebé proteje



sidadaun hotu-hotu, nomeadamente komunidadade LGBTIQ. Tuir loloos, diskriminasaun hasoru sira nu'udar violasaun klaru ida ba direitus umanus. Falta sosializasaun no edukasaun kona-ba lei ida-ne'e permite diskriminasaun atu kontinua.

Problema saúde mentál mós sai dezafiu sériu ida. To'o 51% hosi membru sira hosi komunidadade LGBTIQ relata katak dalabarak sente triste, 31% lakon ona esperansa, no 20% sente katak sira laiha ona valór. Sofrimentu emocionál ida-ne'e sai aat liután tanba falta apoiu sosiál, iha ne'ebé 27.3% de'it maka buka ajuda emocionál, enkuantu 30.3% hili atu la ko'alia buat ida. Kondisaun ida-ne'e hatudu nesesidade ba aprosimasaun ida ne'ebé inkluzivu liu iha forneseimentu servisu akonsellamentu no apoiu psikológiku.

Izolamentu sosiál mós sai problema proeminente ida. To'o 39.2% hosi família sira relata katak sira nia membru família LGBTIQ sira, dalabarak iha difikuldade atu moris sosializa ho komunidadade sira seluk. Individu LGBTIQ sira ne'ebé "halai sai" ka abandona família nia uma, deside atu hela ho sira-nia maluk LGBTIQ seluk, ou sira nia parseiru, hanesan sira espresa dala barak, belun sira maka apoiu úniku ne'ebé sira iha bainhira duni sai sira nia uma ka halai sai hodi salva sira ba asaltu fíziku ka seksuál.

Kona-ba bem-estar ekonómiku, 48.4% moris ho rendimentu kiik liu 100 USD kada fulan, no somente 16.1% maka iha salariu boot liu 150 USD kada fulan. To'o 22.6% maka relata katak sira hetan hamlaha tanba laiha osan atu sosa hahán, 9.7% laiha fatin seguru atu hela iha kalan, no 12.3% labele selu gastu médiku sira. Dadus ida-ne'e hatudu katak iha disparidade sosiál no ekonómiku ne'ebé significativu ne'ebé tenke rezolve kedas.

Maski nune'e, iha dadus pozitivu balu. To'o 67.7% hosi komunidadade LGBTIQ sente konfortavel atu asesu ba servisu médiku sira, ne'ebé hatudu katak esforsu sira atu kria servisu saúde inkluzivu sira hahú fó fuan. Adisionalmente, 81.9% espresa satisfasaun ho sira nia moris atuál, maski dezafiu sira sei iha, ne'ebé refleto reziliénsia no otimizmu hosi komunidadade ida-ne'e.

Iha nivel família, 60.8% hatene katak diskriminasaun hasoru komunidadade LGBTIQ nu'udar krime kontra direitus umanus. Númeru ida-ne'e aas liu kompara ho 61.3% hosi forneseidór servisu sira ne'ebé iha konxiénsia hanesan. Dadus ida-ne'e hatudu katak família sira hahú komprende importánsia atu proteje direitu sira hosi sira nia membru família LGBTIQ, maski lakuna iha komprensaun entre forneseidór servisu sira presiza atu rezolve ho urjente.

Entretantu, 51.3% de'it hosi fornese dór servisu sira maka komprende katak komunidadade LGBTIQ hasoru diskriminasaun hodi asesu ba edukasaun, servisu saúde no setór sosiál sira seluk. Iha parte seluk, 60.8% hosi família sira admite ida-ne'e.

Diferensa sira-ne'e iha persesaun sujere katak família sira dalabarak besik liu ba esperiénsia loloos kona-ba diskriminasaun ne'ebé sira nia membru família sira esperiénsia duké fornese dór servisu sira.

Jeralmente, peskiza ida ne'e hatudu katak maske iha melloramentu iha konxiénsia no aseitasaun, komunidadade LGBTIQ iha Timor-Leste hasoru nafatin dezafiu. Violénsia, diskriminasaun, estrese mentál no dezigualdade ekonómika sai nafatin problema boot ne'ebé tenke rezolve kedas liuhosi abordajen ida ne'ebé komprensivu no inkluzivu. Ho konxiénsia ne'ebé aumenta no esforsu hamutuk hosi parte oioin, iha esperansa atu kria ambiente ida ne'ebé justu no dignu liu ba ema hotu, inklui komunidadade LGBTIQ.

## F. INTERVENSAUN ESTRATEJKA & REKOMENDASAUN

Atu ultrapasa dezafiu sira ne'ebé komunidadade LGBTIQ hasoru iha Timor-Leste, presiza halo intervensaun estratéjika ne'ebé komprensivu no inkluzivu. Primeiru, hasa'e konxiénsia públiku nian tenke sai prioridade ida. Edukasaun bazeia ba komunidadade no kampaña mídia bele ajuda halakon estigma no diskriminasaun. Informasaun kona-ba direitus umanus no importánsia atu respeita diversidade tenke introdús sedu iha eskola sira, no reforsa liuhosi formasaun ba fornese dór servisu sira, atu nune'e sira bele komprende di'ak liután komunidadade LGBTIQ nian.

Segundu, importante atu hadia asesu ba servisu saúde fíziku no mentál ne'ebé inkluzivu. Governu no organiza-saun sira ne'ebé iha relasaun presiza estabelese sentru saúde sira ne'ebé amigavel ba komunidadade LGBTIQ, eki-padu ho pesoál médiku sira ne'ebé hetan formasaun atu fornese servisu sira lahé diskriminasaun. Programa sira akonsellamentu mentál nian mós tenke hadi'a, ho foku ida ba prevensaun depresaun, izolamentu sosiál no risku tentativa suisídiu nian. Servisu sira ne'e tenke fasil atu asesu, tantu direktamente no liu husi tele-konsul-tasaun.

Terseiru, presija kria polítika protesaun legál ba komunidadade LGBTIQ. Governu presiza klarifika no haforsa lei anti-diskriminasaun ne'ebé proteje sidadaun hotu-hotu, inklui komunidadade LGBTIQ. Monitorizasaun ba im-plementasaun lei sira-ne'e mós importante tebes atu asegura katak komunidadade LGBTIQ bele goza sira-nia dire-itu lahé ta'uk ba diskriminasaun ka violénsia. Programa asisténsia legál ba membru LGBTIQ sira ne'ebé hetan vi-olasaun direitu mós presija fornese atu nune'e sira bele sente seguru no hetan justisa.

Ikus liu, hametin apoiu ekonómiku maka parte importante ida hosi solusaun ida-ne'e. Programa formasaun ba abilidade serbisu, asesu ba kapitál negósiu, no oportunidade empregu inkluzivu tenke habelar atu apoia in-dependénsia ekonómika komunidadade LGBTIQ nian. Hodi hasa'e sira-nia partisipasaun iha setór ekonómiku, la'ós de'it bem-estar individuál sei aumenta, maibé mós sira-nia kontribuisaun ba dezvoltamentu nasional sei sai significativu liután. Hein katak kombinasan husi medida sira ne'e sei kria ambiente ida ne'ebé ekuitativu, inkluzivu no apoiu liu ba komunidadade LGBTIQ iha Timor-Leste.

Atu intervensaun estratéjika ne'ebé propoin sai efetivu, presiza iha koordenasaun entre Instituisaun Governu nian, organizaun sosiedade sivíl (OSC), no setór privadu. Tuir mai ne'e hanesan rekomendasaun sira bazeia ba area intervensaun husi orgaun ka instituisaun relevante ida-idak:



1. Ministeriu Justisa (MJ)  
Papél Xavé: Protesaun legál no asesu ba justisa
  - Revee, hadia, hametin, no implementa lei anti-diskriminasaun hodi inklui protesaun esplísitu ba komunidadade LGBTIQ.
  - Hadi'a servisu asisténsia legál ba komunidadade LGBTIQ ne'ebé hetan diskriminasaun ka violénsia.
  - Realiza treinamentu ba ofisiál jurídku sira kona-ba direitu komunidadade LGBTIQ nian.
  
2. Parlamentu Nasionál (PN)  
Papél xavé: Lejizlasaun no aprovasaun polítika
  - Diskute no aprova polítika sira ne'ebé garante protesaun legál no direitu sira komunidadade LGBTIQ nian.
  - Tau matan ba implementasaun polítika anti-diskriminasaun no programa inkluzaun sosiál.
  
3. Sekretaria Estadu ba Igualdade (SEI)  
Papél Xave: Igualdade jéneru no inkluzaun sosiál
  - Garante katak polítika nasionál sira reflète prinsípiu sira igualdade no naun-diskriminasaun nian ba komunidadade LGBTIQ.
  - Dezenvolve kampaña sensibilizasaun públiku hodi hamenus estigma no diskriminasaun.
  - Kolabora ho ministériu edukasaun hodi inklui valór direitus umanus no diversidade iha kurríkulu eskolár.
  
4. Ministeriu Saúde (MS)  
Papél Xave: Asesu ba servisu saúde ne'ebé inkluzivu liu-tán
  - Dezenvolve servisu saúde fíziku no mentál ne'ebé amigavel ba komunidadade LGBTIQ iha sentru saúde nasionál no rejionál sira.
  - Treina pesoál médiku sira atu fornese servisu sira laho diskriminasaun.
  - Instala servisu tele-konsultasaun saúde mentál nian hodi asegura asesu saúde mentál ne'ebé luan liu.
  
5. Provedoria dos Direitos Humanos e Justiça (PDHJ)  
Papél xave: Monitorizasaun ba direitus umanus
  - Monitoriza no relata violasaun ba direitu komunidadade LGBTIQ nian.
  - Fó rekomendasaun ba Governu hodi hadi'a protesaun legál.
  - Kolabora ho Organizasaun Sociedade Sivil hodi halo advokasia ba direitu komunidadade LGBTIQ nian.
  
6. Polísia Nasionál Timor-Leste (PNTL)  
Papél xave: Seguransa no protesaun husi violénsia
  - Treinu ofisiál polísia sira kona-ba maneja kazu diskriminasaun no violénsia bazeia ba jéneru no orientasaun seksuál.
  - Asegura resposta lalais ba keixa violencia hasoru komunidadade LGBTIQ.
  
7. Sekretária Estadu ba Komunikasaun Sosiál  
Papél xave: Jere polítika komunikasaun públika no mídia nian iha Timor-Leste, inklui asegura divulgasaun informasaun ne'ebé loos, edukativu no inkluzivu. Instituisaun ida-ne'e iha responsabilidade atu koordena estratéjia komunikasaun governu nian, tau matan ba mídia nasionál, no promove valór sira diversidade no direitus umanus liuhosi kanál komunikasaun oioin.
  - Halo kampaña Pública atu Halakon Estigma no Diskriminasaun
  - Matadalan sira ba Komunikasaun Governu nian ne'ebé Inkluzivu
  - Formasaun ba Jornalista no Mídia ba Reportajen ne'ebé Justu no Inkluzivu

8. Sekretária Estadu ba Formasaun Profisionál no Emprego (SEFOPE)  
Papél xave: Formasaun ba abilidade sira no asesu ba serbisu
  - Fornese programa formasaun serbisu inkluzivu ba comunidade LGBTIQ.
  - Kolabora ho setór privadu sira hodi kria oportunidade empregu ne'ebé la diskriminatóriu.
  
9. Ministériu Komérsiu no Indústria (MKI) Papél xave: Apoiu ekonómiku no asesu ba negósiu
  - Dezenvolve programa apoiu empzezariál ba comunidade LGBTIQ, inklui asesu ba kréditu no kapitál negósiu.
  - Asegura katak polítika negósiu nian sira inkluzivu no la diskriminatóriu.
  
10. Banco Nacional de Comércio de Timor-Leste (BNCTL) & Instituisaun Mikrofinansas  
Papél xave: Asesu ba finansiamentu no finansiamentu negósiu nian
  - Fasilita kréditu negósiu ba empzezariu sira husi comunidade LGBTIQ.
  - Enkoraja inkluziun finanseira liuhosi fornese formasaun jestaun finanseira ba comunidade vulneravel sira.
  
11. Câmara de Comércio e Indústria de Timor-Leste (CCI-TL) & Setór Privadu  
Papél xave: Parseria empzezariál no inkluziun forsa traballu
  - Asegura katak empreza implementa polítika rekrutamentu ida ne'ebé la diskriminatóriu.
  - Enkoraja empzegadór sira atu fornese oportunidade empregu ne'ebé hanesan ba comunidade LGBTIQ.
  - Hala'o formasaun empreendedorizmu ne'ebé inkluzivu.



## Referensia sira

- Cahill, C. (2007). The personal is political: Developing new subjectivities through participatory action research. *Gender, Place & Culture*, 14(3), 267–292.
- Chambers, R. (1981). Rapid rural appraisal: Rationale and repertoire. *PUBLIC ADMINISTRATION AND DEVELOPMENT*, V, 1, 95–106.
- Chambers, R. (1996). Participatory rural appraisal and the reversal of power. *The Cambridge Journal of Anthropology*, 19(1), 5–23.
- Chen, L. (2020). Report on Women in Agriculture in Timor-Leste. OXFAM in Timor-Leste.
- Chen, L., & Martins, M. (2022). A gender analysis of access to Cesta Basica (Food Basket): A case study of Likisa and Dili municipality of Timor-Leste. In Y. Wahyuningrum, J. M. Baysa-Barredo, & T. Wicaksono (Eds.), *ASC monograph 2021: Advancing Southeast Asia through gender mainstreaming*. ASEAN Studies Center, Gadjah Mada University.
- Freire, P. (1970). *Pedagogy of the oppressed* (Repr). Continuum.
- Gatenby, B., & Humphries, M. (2000). Feminist participatory action research: Methodological and ethical issues—ScienceDirect. *Women's Studies International Forum*, 23(1), 89–105.
- Goessling, K. P. (2024). Learning from feminist participatory action research: A framework for responsive & generative research practices with young people. *Action Research*, 0(0), 1–23.
- Lykes, M. B., Bianco, M. E., & Távora, G. (2021). Contributions and limitations of diverse qualitative methods to feminist participatory and action research with women in the wake of gross violations of human rights. *Methods in Psychology*, 4(3), 100043.
- Maguire, P. (1987). *Doing participatory research: A feminist approach*. University of Massachusetts.
- Niner, S. (2018). Vidas e Direitos LGBTI em Timor-Leste. *Diálogos*, 3, 163–183. <https://doi.org/10.53930/27892182.dialogos.3.87>
- Pratama, M. P., & Afriani, F. (2024). Mapping of the LGBTIQ and SOGIESC-inclusive studies using feminist participatory approach in Southeast Asia. *ASEAN SOGIE CAUCUS*.
- Reinharz, S. (1992). *Feminist methods in social research*. Oxford University Press.
- Reuters. (2017). East Timor Offers Hope for LGBT Rights. *VOANEWS*.
- Saeed, I., & Galhos, B. (2017). A Research Report on the Lives of Lesbian and Bisexual Women and Transgender Men in Timor-Leste. Rede Feto and ASEAN SOGIE Caucus. Human Right Adviser's Unit – UNRCO Timor-Leste. (2022). *Discrimination and Access to Education of Lesbian, Gay, Bisexual, Transgender and Queer persons in Timor-Leste*.
- UN High Commissioner for Human Rights. (2011). *Discriminatory laws and practices and acts of violence against individuals based on their sexual orientation and gender identity: Report of the United Nations High Commissioner for Human Rights*. UN.
- UN Human Rights Council. (2011, February 3). *Joint statement on ending acts of violence related human rights violations based on sexual orientation and gender identity*. Wendy, F., Patricia, M., & Reid, C. (2009). The 'f' word has everything to do with it: How feminist theories inform action research. *Action Research*, 7(1), 13–29.













#### Arcoiris Timor Leste

Arcoiris Timor Leste is a legally registered NGO with the Ministry of Justice, Govt. of Timor Leste. It exists to advocate and promote the equal human rights for all and to support establishment of an integrated LGBTIQ+ policy framework and the implementation of a range of programs to improve the lives of the community with special focus on Lesbian Bisexual women and Transmen community members in Timor-Leste.

Dili, Timor Leste

Web address: [arcoiristimorleste.com](http://arcoiristimorleste.com)

Email address: [enquiries@arcoiristimorleste.com](mailto:enquiries@arcoiristimorleste.com)

Facebook: Arcoiris Timor Leste



#### ASEAN SOGIE CAUCUS

#### ASEAN SOGIESC CAUCUS (ASC)

The ASEAN SOGIE Caucus (ASC) is a network of human rights activists from Southeast Asia. The ASC works for the inclusion of Sexual Orientation, Gender Identity, Gender Expression, and Sex Characteristics (SOGIESC) in the mandate of human rights duty bearers in the ASEAN region. The ASC works for the promotion and protection of the human rights of all persons regardless of SOGIESC in the Southeast Asian region.

Legally Registered in the Philippines as Southeast Asia Sexual Orientation, Gender Identity and Expression Caucus (ASC), Inc. The organization is in Special Consultative Status with the UN ECOSOC since 2021.

Quezon City, Philippines

Email: [communications@aseansogiecawcus.org](mailto:communications@aseansogiecawcus.org)



#### Women's Fund Asia

#### WOMEN'S FUND ASIA (WFA)

Women's Fund Asia is a regional women's fund, committed to supporting women, girls, trans, and intersex people led interventions to enhance and strengthen access to their human rights.

30/62A Longden Place,

Colombo 7, Sri Lanka

Tel. No: +94 11 4324541

E-mail: [info@wf-asia.org](mailto:info@wf-asia.org)

Facebook: [facebook.com/WFAsia](https://facebook.com/WFAsia)

Instagram: [instagram.com/wfasia](https://instagram.com/wfasia)

LinkedIn: [linkedin.com/company/wfasia/](https://linkedin.com/company/wfasia/)

Twitter: [@WF\\_Asia](https://twitter.com/WF_Asia)

The Publication was produced with the funding support from Women Fund Asia and ASEAN SOGIESC Caucus.

